

Mark ka Te Pabe'e Jesus, Te Naa Tooa'a-witu, Numu oo Tuukwena

¹⁻³ Nu sakwa Te Pabe'e Jesus Te Naa Tooa-witu, mu tuukwe. O'nosoo Te Pabe'e petukwu-witu, mu Te Naa yadooawabe tubotuguna yise meeo, “Mana ka hemma nadukadu gi naa-wi'yoona sumu'yoo nana ka Te Naa pooha-toohakwi yadooakwu, ‘Mu sakwa muusoo namabetseapunne, ka Te Pabe'e pudusoo kodyu petukwuno'oto. Mu sakwa kaaheno tusooyugwepunne, o'no mu oo nakabetseanokwu.’ ”

⁴ Ka saa'a sumu'yoo nana John mee naneadu ka numu baa-wi matzakadyakwe, oona ka hemma nadukadu pukwi gi naa-wi'yoona. Soo John ka mu numu ma'emukwapu, mu nanekwaha tu-ungu. “O'no soo Te Naa mu ma'emukwana soomu'wakwu,” mee mu netamma. Ka mu nanek-wahakese, soo John yise baa-wi mu matzakakwu.

⁵ Ewa'yoo numu tooe hanotoo tooe oo-baa petudyakwe.* Umu ka suda tu tumatugupu wahana yise oo nemawunidyakwe, ka kaaheno meadabekwu mee mu tusooyugwese, soo John yise Jordan mee naneadu ka hooo-kwi mu matza-kadyakwe.

* **1:5** a Jerusalem mee naneadu-witu, ewa'yoo tuwazoo ka teepu Judea mee naneadu-witu, no'oko ka teepu-koobatu tooe, ka baa hoodu Jordan mee naneadu-kumitu tooe.

⁶ Soo John a puhu nagwesena namadabue-wi kwaseana, yise mokobu-ma nate'a. Kua noko nota peha natumatzu'atoona tukana. ⁷ Soo John yise mee mu numu netammayakwe, “Soo Te Pabe'e pudusoo petukwu, nuga oonakwasoo unu pooha-ga'yoo, yise nuga oonakwa tuwazoo besa'yoo. ⁸ Nu baa-wi mu matzaka, mu ka sutakoo po ma'wukase, ka besa'hoo podo meadabekwu. Pana soo Te Pabe'e ka Tu Besa Pooha-ma mu sootuhikwu.”

⁹ O'no yise soo Te Pabe'e ka Nazareth, ka teepu Galilee mee naneadu-kooba'yoona kemmana ka John-baa petuhooga. Soo John yise ka Te Pabe'e baa-wi matzaka, ka hooodu Jordan mee naneadu-wi. ¹⁰ Ka Te Pabe'e batseboogena, o poonne ka Te Naa Besa Pooha pa'anakwana kwe'na'a tubongo punoonooekwuekedu-kwa'ne manegese oo-naga mani petu. ¹¹ Soo Te Naa pa'anakwana meeo oo netamma, “U yow Nuga Besaa Tooa, nu-kwa'ne'yoosoo. Nu unu u soopedyana besa u-koobatu soonamme.”

¹²⁻¹³ Soo Te Naa Besa Pooha yise ka Te Pabe'e oona numu-wanatoo taya. Soo Te Pabe'e yise ka mu nunu'u-baa watsumano (40) too'i. Soo Suta'yoo oo-baa petugase oo too'e ma'emukwa pana soo Te Pabe'e gi oo-ma naka'emukwa. Mu toha kakasa-ga'yoo ka Te Pabe'e sootummatzise soo Te Pabe'e oo-toogoo tsebooe.

¹⁴ Ka John nawutumase soo Te Pabe'e ka teepu Galilee mee naneadu-kwitoo nanesootuhibu mu numu tunedyooeme'a. ¹⁵ Ka mu numu meeo netamma, “Pudusoo Te Naa noko mu numu nemadabuekwu. Mu sakwa ka sutakoo gi naka-

betseapana, yise ka Te Naa besa unnepu suu'mu naka'oedyuku.”

¹⁶ Waha'yoo pakwe-gadu naana, nawanga'a Andrew-no Simon mee nananeadu, ka pumma tu tuukwina ka banunadu-witoo wukwazuyakwe, oonow soo Te Pabe'e ka bakumana me'a. ¹⁷ Soo Te Pabe'e meeo mu netamma, “Mu sakwa nu-no mease e nakatzimodu mane. Nu oo mu mayugwese, mu saa'a ka mu numu nuka nakatzimodu mayugwedooa.” ¹⁸ Umu nawanga'a yise ka pumma tu tuukwina ma'wuhookase, ka Te Pabe'e nagegakwate.

¹⁹ Umu tzage'e soo waha'yoo nawanga'a, James-no John, ka tu naa Zebedee mee naneadu-no ka tu naa sake-wi. Umu ka pumma tu tuukwina mabetsabedyakwe. Soo Te Pabe'e ka banunadukumana meadabena mu poonne, ²⁰ yise umu nawanga'a tuwazoo bihooka. Umu yise ka tu sake noko tu naa ma'wuhookase, Te Pabe'e nakwisoo puno memeahoo.

²¹ Soo Te Pabe'e yise ka Capernaum mee naneadu-wi petuga. Nanesootuhi tabeno ka mu nanesootuhi nobe-wi petugase, ka mu numu besasoo Te Naa-witu tuukwe'e. ²² Mu numu yise ka Te Pabe'e-witu mee netamma, “Soo Te Pabe'e yow, oosoo tubetse besa ka Te Naa unnepu-witu wahadyakwe, gi ka te tunedyooedu-wa'ne'yoo.” ²³ Sumu'yoo nana tsoapayidu oe. ²⁴ Soo nana tsoapa-toohakwi wa'age, ka Te Pabe'e meeo netamma, “Uda! U haa'a kadoo'oo ne mayugwekwu? U sakwa ne tsasopedya. Numme u sopedakwatoo, u Jesus, noko Hemma Manumudoopu Besaa Tooa.” ²⁵ Soo

Te Pabe'e ka tsoapa nematzagakwunihoo meeo oo netamma, “Gi unnepana, mana-ga'yoona tsebooegea.” ²⁶ Soo tsoapa kwebewununa yise paba wa'akese tsebooegea. ²⁷ Mu numu yise mee nananetammakooaha, “Uune'yoo! Numme gi hannano'o mownnekoo poohabe poonnedu. Soo Te Pabe'e puu sukwe yadooase ka tsoapa nematzagakwunihoo.” ²⁸ Mu numu yise ka Te Pabe'e-witu nanatuukwe ka teepu Galilee mee naneadu-koobakwitu.

²⁹ Soo Te Pabe'e yise watsukweoo tu pupua'amu-no ka mu nanesootuhi-wi'yoona mea'ase, ka Simon Peter-baa petuga. ³⁰ Simon Peter yahe peawabe unu tuoeya'ena, tu tookoo unu udutu hape. Umu oo nobe-witu ka Te Pabe'e tuukwe'e. ³¹ Soo Te Pabe'e yise oo-baa petugase, oo mi-makoo oo tzadyoda. Oosoo yise yotseoose, saahoose, mu tukatuungu.

³² Oogowsoo yongona tu taba egease, mu numu tuoegoedu ka Te Pabe'e-baa bi petudyakwe. ³³ Tubetse ewa'yoo mu numu ka nobe-kobena sumupunne. ³⁴ Soo Te Pabe'e umu numu-ma matuoonase, mu no'obatusoo tuoegoedu numu mabesaku, mu tsoapagoedu tuwazoo. Soo Te Pabe'e yise gi mu unne tuungu. Soo Te Pabe'e mu tsoapagoedu gi ooka mu wahakwuna petzape, umu ka oo sopedakwadoona.

³⁵ Oogow moo'a awamooa tooesoo tu toganop-unne soo Te Pabe'e yotsese, oona numu-wanattoo mease nanesootuha'e. ³⁶ Saa'a soo Simon tu pupua'amu-no oo wateka. ³⁷ Ka oo mayuse, meeo oo netamma, “Mu numu u kwate, u sakwa kodyugasoo,” mee. ³⁸ Pana soo Te Pabe'e mee mu

netamma, “Mu numu mana tooe nonobe-gakoo sakwa nu ka Te Naa besa unnepu mu tuukwe. Soo e pooha meeo e netamma, ‘Manatutooe mu numu ekow nanesootuhibu tunedyooe.’ ” ³⁹ Soo Te Pabe'e oona ka teepu Galilee mee naneadu-witu ka mu numu tuukwe'e, ka mu nanesootuhi-wi'yoona.

⁴⁰ Sumu'yoo nana unu tookoo uayidu, ka Te Pabe'e-baa petuga. Ka Te Pabe'e-baa petugase, nanesootuhina meeo oo netamma, “U sakwa e mabesaku ka meeo soonammena.” ⁴¹⁻⁴² Soo Te Pabe'e Jesus oo nakasootuhise, yise oo mimakoo oo tzamahoose, mee oo netamma, “Nu u mabesakukwu. U besa manekwu. ⁴³⁻⁴⁴ Yabesoo u sakwa ka te nanesootuhiwabe petuoose oo tza-poonneku ka besa manese, yise ka Te Naa ka Moses tamme netamma-wa'nesoo, oo tzapoonneku ka u tookoo uayina namabesakuse. Pana tubetse gi ka mu numu tuukwepana ka ume e mabesakuna.” ⁴⁵ Pana soo nana ewow mu numu tuukwe ka Te Pabe'e-witu, yise tooe hano'yoona tooe ewa'yoo numu oo-baa petudyakwe. Soo Te Pabe'e yise kwinga'a numu-wanaroo mea, gi yise punowsoo kodyuka'a.

2

¹ Huu tabe mease, soo Te Pabe'e ka Capernaum-wi kodyu petuga. Ewa'yoo numu yise oo petugana nakow, ² yise oo-baa petudyakwe. Ka nobe kaa'no, ka natzakwuna-kobenakwi tuwazoo. Soo Te Pabe'e mu numu tunedyoo'e ka Te Naa-witu. ³ Watsukwe'yoo nanana kapawikoo ka gi yutsungadu nana tzakwuhuna ka nobe-wi petuga. ⁴ Umu ka Te Pabe'e-maroo oo

tzakwuhookase sapa, ewa'yoo numu ka nobe-wi, umu gi hownnekoo oe tzoonoa'a. Umu yise ka nobe-koobatu tzatawagase, ka kapanoosoo tobongo oo tzakweku ka Te Pabe'e-kobenatoo. ⁵ Soo Te Pabe'e oo sopedakwatoo, ka mu naana pumme mu naka'oedyukute, yise ka gi yutsungadu nana meeo netamma, "E pua'a, nu ka u tuma'emukwana soomu'wakwu." ⁶ Umu Jew numu tunedyooedu o aatadu mee sokwama, ⁷ "Esoo hayoo suda na'unnedu unni. Masoogina ka Te Naa-wa'nesoo tusooyugwe, mee soonamme. Soo Te Naa suu'mu ka numu tuma'emukwana soomu'wa." ⁸⁻⁹ Soo Te Pabe'e yise oo sopedakwatoo, ka mu tusooyugwana yise meeo mu netamma, "Mu gi e naka'oedyukute nu ka mu numu tuma'emukwana soomu'wa, pana mu oo poonnekwu ka nana e mabesakuse. ¹⁰ Mu yise oo sopedakwadookwu nu eka teepukooba ookow poohabe hee-ga'yoo, ka mu numu tuma'emukwana e soomu'wakwuna." Soo Te Pabe'e yise ka nana gi yutsungadu meeo netamma, ¹¹ "Wunuoose ka u kapa nobe-witoo tzakwuka." ¹² Soo nana yise ka tu kapa tzakwuhuna mea. No'yoona mu numu oo soo'oedyukuna meeo, "Te Naa tubetse besa'yoo. Numme nanabesow namanedu yaa tabeno poonne. Numme gi haanano'o yoonnekoo poohabe poonnedu."

¹³ Soo Te Pabe'e yise ka banunadu-kumabasoo petugase, ewa'yoo numu oo-baa petudyakwe. Soo Te Pabe'e ka Te Naa unnepu mu tuukwe.

¹⁴ Sumu'yoo nana Levi* mee naneadu oonow

* **2:14** Oo naa Alphaeus mee naneadu.

natzakwuna-wi katuna tumasumudoodyakwe. Soo Te Pabe'e o meana oo poonne, ka o oo katu, yise meeo oo netamma, “U sakwa umu e nakatzimodu-matu mane.” Soo Levi yotseoose, oo nageka.

¹⁵ Saa'a soo Te Pabe'e ka Levi nobe-witoo oo-no mea, umu tukaga. Ewa'yoo numu tumasumudoodu o, tuma'emukwadu mee mu Pharisee mu ne'a, umu ka Te Pabe'e nagedu yise umu-no tuka.

¹⁶ Mu Pharisee ka Te Pabe'e umu-no mu tuka mu poonnese, meeo ka umu oo nakatzimodu netamma, “Umu mumme tunedyooedu sakwa gi suda tumatugudu numu-no tukapana, umuoo tumasumudoodu ooonne'yoo.”

¹⁷ Soo Te Pabe'e ka mu nakase, mee unakwe, “Nu yaa ka teepu-kooba petu, ka mu tuma'emukwadu Te Naa-witu tuukwekwuse. Ka mu numu mooasoo kaaheno meadu mooasoo Te Naa-witu sopedakwatoo. Soo pooha-ga'yoo puu tuoegoedu numudoo suu'mu naba'e, gi ka besow numudoo, nu puu ka mu tuma'emukwadu suu'mu tummatza'e, gi ka besow numu.”

¹⁸ Susumudu numu yise ka Te Pabe'e-baa petuse mee oo netamma, “Umu John pupua'amu yise ka mu Pharisee-no mee tunetamma, ‘Numme puu gi tukapana nanesootuhiyakwe.’ How yise umu ume nakatzimodu gi punno'o oosoo tumatugu?”

¹⁹ Soo Te Pabe'e mee mu nanekwegea, “Nu togesoo yaahoo umu-no, pudu nodukwadoodu-kwa'ne, umu puu ka nanano'yoona besa sokwama. ²⁰ Pana pudusoo nu gi umu-no'yookwu, o'no yise umu e nakatzimodu gi tukapana nanesootuhikwu.

²¹⁻²² Ka oohoo a manepunne mu gi hownnekoo ka mu numu pudu tumayohope no'oko ka mumme putoogoo mooa tumayohope mayua-wa'ne'yoo. Oosoo puu wanapu nadotsana-kwa'ne. U pudu wanapu ka mooa wanapu-ma dotsanase, oosoo gi toge tubuakwu. Mu gi hownnekoo eka mumme pudu natunetammakuna ka mu mooa tumayohope noko mayua-wa'ne'yoo.”

²³ Sumu nanesootuhi tabeno, soo Te Pabe'e yise umu pumme nakatzimodu-no ona tubewabe-too me'a. Umu tseagoena ka wada-matu mabokana, oo mahangeana oo tuka. ²⁴ Mu nanesootuhidu Jew numu moohedu, Pharisee mee nananeadu, mu poonne, umu yise ka Te Pabe'e meeo netamma, “Umu u nakatzimodu gi ka te Jew tumayohope mayoho. Umu ka wada mahangeana oo tukadyakwe, esoo nanesootuhi tabeba, gi numu hemma howyugweno'o.”

²⁵ Soo Te Pabe'e yise meeo mu netamma, “Mu sakwa oogow nea ka o'nosoo soo besa tamme-kooba katudu, David mee naneadu, punno'o ka ne Jew tumayohope takopa, ka tu pupua'amu-no tseagoena. ²⁶ Soo David ka Te Naa nanesootuhi nobe-witoo mease ka tu pupua'amu-no, soo nanesootuhibu numu tunedyooedu Abi-atha mee naneadu, ka pooha tukaba mu maka, umu nanesootuhibu numu tunedyooedu suu'mu tukana. Soo Te Naa yise gi hayoo mu netamma. ²⁷ Soo Te Naa ka nanesootuhi tabeba nemadabue ka mu numu nasootuhi-kwi, gi sakwa mu numu o'no hemma how yugwe tuungu. ²⁸ Nu yow Mu

Pabe'e. Nu mu manekwuna nemadabue ka nanesootuhi tabeno.”

3

¹ O'no yise soo Te Pabe'e ka mu nanesootuhidubaa petuga. Soo nana mi pasatopo'nepu gi miyut-sengudu ka nanesootuhipe-wi. ² Mu tunesootzema-du yise ka Te Pabe'e poonnepunne how saa'a soo Te Pabe'e ka nana mi mabesaku. Umu ka Te Pabe'e how u nanesootuhi tabeno numu sootuha'e? Mee oo too'e netammakwuse. Oo wohonedu oo hoawipunne, ka gi hemma ha'oo nuugweno'o oo oo manakwe.

³ Soo Te Pabe'e meeo ka nana netamma, “Yaa-too kemma.” Soo nana ka Te Pabe'e-baatoo me'ahoo. ⁴ Soo Te Pabe'e ka umu pumme poonnepunnedu meeo netamma, “Ka pabow tabeba-wi gi hemma how nuugweno'o, o'no haa'a suta'yoo? Yise o'no tabeba haa'a mu gi ha'yoo oo sooyugwe? O'no haa'a mu gi namabesakukwu? O'no haa'a ka pabow mu tabebano'o, ya'epana gi how'neyoo?” Umu yise gi tunema'yuhoo. ⁵ Soo Te Pabe'e yise gi besa mu sooyukwe mu soosawikuna, gi mu numu nakasootuha'e.

Soo Te Pabe'e yise meeo oo netamma ka gi mayutsungadu, “Matuhe.” Oosoo yise matuhe, oo mi namabesakuhoo.

⁶ Mu Pharisee oe'yoona mea'ase, mu wawkawa'amu numu pabe'e pupua'amu-no oetu nehanegonno, no'yoona mee tusoo'yukwe umu sakwa Te Pabe'e batsa mee.

⁷⁻¹² Soo Te Pabe'e umu tunakatzimodu-no yise ka banunadu-kumaba petuga. Ewa'yoo mu numu, ka Te Pabe'e nakatza'e, mu

tuoegoedu besa oo mayugwepu-witu nakadu tooe hano manakwanatu tooe*, oo-matoo kemma. Mu tsoapagoedu ka Te Pabe'e-baa petuse, oo-kobena'yoona nanesootuhina meeo oo netamma, “U yahoo. U ka Mu Numu Manumudoopu Tooa,” mee. Soo Te Pabe'e yise mee mu netammadyakwe, “Mu gi meeo tuukwepana.”

Soo Te Pabe'e ka mu tunakatzimodu mee netamma, “Mu sakwa ka sake mabegapunne, nu oe meahookwu.” Mu numu ka Te Pabe'e tu tsamowkwunu petzabena, umu nanamatsagawunu.

¹³ Soo Te Pabe'e yise ka giba-matoo meahoose, ka umu pumme nakatzimodu bi, ka mu netutzease. ¹⁴ Sumumano wahamatseboookudu (12) umu-nagatu netutzease yise meeo mu netamma, “Mu e yadooawabe manekwudu. Nu yise nanesootuhibu mu numu mu tunedyooe tayakwu. ¹⁵ Mu pooha-gana tsoapa nematzakwunikwu.” ¹⁶ Umu oo yadooawabe mee nanane'a Simon, soo Te Pabe'e Peter meeo oo neahoo, ¹⁷ James tu wannga'a John-no, mu naa Zebedee mee naneadu. Soo Te Pabe'e ka James noko John Nunuadu-kwa'ne mee mu ne'a. ¹⁸ Andrew, Philip, Bartholomew, Matthew, Thomas, James, oo naa Alphaeus mee naneadu, Thaddeus, Simon,

* **3:7-12** Mee nananeadu-na-kwana kemmadu: Susumudu Galilee mee naneadu-kwitu; susumudu ka Judea mee naneadu-kwitu; susumudu ka tuwazoo Jerusalem mee naneadu-kwitu; susumudu tuwazoo Idumea mee naneadu-kwitu, ka baa hooodu oenapatu, Jordan mee naneadu-kwitu; susumudu ka wakwawa'amu-manakwana, Sidon mee naneadu menakwa. Mu numu ewana ka Te Pabe'e-baa nobedugadyakwe.

ka Cana mee naneadu-wi'yoona kemmadu, ¹⁹ soo Judas punno'o saa'a oobenakwa tukwutumadu ka Te Pabe'e-matoo bika.

²⁰ Soo Te Pabe'e tu nobe-wi kodyu petuga. Mu numu yise ka nobe-wi ewa mani petuga, soo Te Pabe'e ka umu tunakatzimodu-no mu mabetseana, gi ooosapa tuka. ²¹ Mu nanumu gi oo marena nakana, umu yise meeo sokwama, "Esoo emukwa. Numme sakwa nobe-witoo oo tzakaka," mee.

²² Mu Jew numu nanesootuhiwabe ka Jerusalem-wi'yoona kemma'ase, ka Te Pabe'e-baa petugase, ka Te Pabe'e nesootzemana meeo, "Oosoo numu poohadu. Oosoo sutakoo poohagana ka tsoapa nematzagakwunidyakwe."

²³ Soo Te Pabe'e yise meeo mu netamma, "Sutakoo u pooha-gana gi hownnekoo tsoapa nematzagakwuni-kwa'ne'yoo. ²⁴ Ka yoonnekoo, mu numu sukwe nanayadooena, gi hownnekoo hemma nemamaku ewa nanatumoo'oo.

²⁵ Mu naanapua'amu sukwe nanahase gi hemma nemamaku-wa'ne'yoo. ²⁶ Mu numu poohadu naduyadu sutakoo pooha-ga'yoo,

gi hownnekoosoo sutakoo nematzagakwuni-wa'ne'yoo. Mu sutakoo pooha-ga'yoo gi puusoo tu nanagoena petzape. ²⁷ Nu ka sutakoo oonnakwa unu pooha-ga'yoo, yise nu tuwazoo unu nazoo'e.

Nu mu mesoo matzooekute. ²⁸ Ka no'oko suda te tumatugupu soo Te Naa kadoo'oo mayugwekwu, ka ooka te nekwa'e. Ka Te Naa-witu gi suda netammapana tuwazoo. ²⁹ Pana ka ooka Te Naa Besa Pooha suta'yoo mee netammadu, soo Te Naa gi oo soomu'wakwu." ³⁰ Mee soo Te Pabe'e mu netamma, ka tu Besa Pooha mu nesootze'ma.

³¹ Soo Te Pabe'e pea-no oo wannga'amu yise petugonno, obe puuwana konno ka oo yadooadyakwe.

³² Ewa'yoo mu numu oo nana'oonnakwi aatadu meeoo oo netamma, “U pea-no u wannga'amu obe puuwana'yoonu u-no neyadoo'a.” ³³ Soo Te Pabe'e meeoo mu nanekwegea, “Haga e pea-no e kwangamu?” ³⁴ Ka umu tu na'oonnakwi aatadu poonnese meeoo mu netamma, “Mu suu'mu yaatu e nanumu. ³⁵ Mu ka E Naa te pa'anakwatu nakabetseana, no'yoonu mu ka E Naa nakabetseana, e tubetse nanumu.”

4

¹ Soo Te Pabe'e ka banunadu-kumaba'yoonu mu numu tunedyoo'e. Ewa'yoo mu numu oo na'ena-kwi manepunne, soo Te Pabe'e yise ka sake-wi tseboose oe katu; mu numu yise ka banunadu-kumaba konno. ² O'no soo Te Pabe'e ewa mu numu tunedyooena, meeoo mu tuukwe'e, ³ “E nakapunne, sumu'yoo nana ka tubewabe-wi tumasu'a. ⁴ Susumudu soo oo pooe tumasua-matu ka a nadapodo-witoo sawemena, mu hootseba'a yise mu soo'a. ⁵ Susumudu soo oo pooe punno'o unu tupe-ga-nagatoo sa'we, gi tookapu teepu-ga-witoo. Umu yabesoo naahoose sapa, ⁶ soo taba mu koopasakuhoo, umu ka gi tookapatoo tunagana. ⁷ Susumudu tsa'abu-nagatoo sawe meana, naa pana mu tsa'abu ewa naana mu tatsatsebooa. ⁸ Susumudu besow teepu-koobatoo sawehoose besa na'a. Umu tumasape ewa pooedoo'a.” ⁹ Soo Te Pabe'e yise mu numu meeoo netamma, “Mu sakwa e nakapunne, mu ka besow naka-gana.”

¹⁰ Umu Te Pabe'e nakatzimodu mu numu-no ka Te Pabe'e-baa petugase, mee'e oo tubenga, "Ha'oo manena u mu numu natugwe'nga?" ¹¹ Soo Te Pabe'e yise mu nekwegease mee unakwe, "Mu e nakatzimodu mooasoo nasootuhipu. Mu mooa-soo oo nakasopedakwadoo, ka Te Naa unnepu. Mu nasootuhipu, pana mu numu gisoo ookow nasootuha'e, ooonne'yoonu nu meeo mu natugwengakatu Te Naa nuka tunetammakuna.

¹² 'Mu ooosapa ka Te Naa besa unnepu nakamo, pana gi oo soonaka'oedyukute. Mu tuwazoo tooe oo poonne pana gi oo soonakasopedakwadoo. Mu sakwa ka mumme oo tuukwena naka'oedyukuna, mu poonnena nakasopedakwadoona, o'no sakwa mu numatoo kemmase, nu yise mu sootuhikwu.'

¹³ Mu haa'a ka nuga natuukwepu sopedakwadoodu? Ha'oo yise mu ka ekow na'unnepu mumme e tuukwe'e gi oo nakasopedakwatoo?

¹⁴ Soo Te Naa yadooana ka numu tumasu'akwa'ne'yoo. Soo numu yise ka teepu-wa'ne'yoo.

¹⁵ Soo numu ka teepuna tumasu'ana, susumu-kwi gi besa na'a. Soo numu ka Te Naa yadooana gi oo naka'oedyukute. Soo gi toge'yoo yise mu numu tza'emukwa. Mu natza'emukwadu yise ka po-koobattoo sawetu-wa'ne'yoo.

¹⁶ Susumudu numu ooonne'yoo gi tunagadukwa'ne'yoo. Ka mooe'ugasoo susumudu besa sokwamana pumme tu nesootze'ma ¹⁷ yabesoo ka Te Naa yadooana soomu'wa.

¹⁸⁻¹⁹ Susumudu numu ka teepuna naadu, tsa'abu-wa'ne'yoo. Soo ooonne'yoo numu ewa tu hee-gana petukute. Ka tsa'abu-wa'ne'yoo

yabesoo ewa'a, yise ka Te Naa yadooana gi naka'oedyukute.

²⁰ Susumudu soo numu besa tumasu'a, ka besow teepu-wi. Ewa'yoo mu numu tunaka'oedyukudu manekwu, tamme ka Te Naa besa unnepu mu tuukwena.”

²¹ Soo Te Pabe'e yise mee mu netamma, “Tugootabuagunoo gi he-toooha sukwe nuunadu. Pa'a'yoonu mu gootabuakupunnena, yise no'oko hemma gootabuakute. Soo e natugwengapu tugootabuagunoo-kwa'nesoo.

²² Umu-wa'nekoosoo nu ka Te Naa-witu mu tunesootabuedooa. ²³⁻²⁵ Mu e naka'oedyukudu tubetse unu sokwamakwu, mumme e tuukwe-kwa'ne, mu yise unusoo besa tusopedakwadookwu. Mu gi e nakabetseadu no'oko oo soomu'wakwu.”

²⁶ Soo Te Pabe'e meeo mu netamma, “Mu numu ka Te Naa unnepu-witu nakase e naka'oedyukudooa. Oosapa mu manemokwu tumasu'ape-kwa'ne. Sumu'yoo nana puu ka tubewabe-wi wahabu masu'ase, ²⁷⁻²⁸ oosoo puu gi nasootabue yabesoo na'a. Tooe togano, tooe tabeno tooe, yabesoo na'a. Oo naa tabu'ana, tamme gi sopedakwatoo. ²⁹ Naakese, pa'a wunukese, yise ka naa makwuse, nakutadu.”

³⁰ Soo Te Pabe'e yise meeo, “Mu ka e naka'oedyukuna ewa manese nu mu tuukwekwu. Meno'o huutse'yoosoo numu E Naa-wi tunaka'oedyute, ³¹ atsapoee-kwa'ne. Atsapoee tuutse'yoo ka namasuana, ³² oosoo puu pa'a naakese kwasu, mu hootseba'a yise oo-naga nobe-too.”

³³⁻³⁴ Soo Te Pabe'e ewow numu nanatuukwe'e, hemma mu nakasopedakwatoo-kwikoo, yise saa'a soo Te Pabe'e ka nanatugwengapu tu nakatzimodu watse tunesootabuedooa.

³⁵ Ka tu yongokese, soo Te Pabe'e yise mu pumme nakatzimodu mee netamma, "Tamme ka banunadu oenapatoo meakwu." ³⁶ Mu oo nakatzimodu mu numu ewatoo mease, ka Te Pabe'e-baa sake-wi tzoonoase ka baa natze-mangega. Susumudu ka sake-wi umu-no. ³⁷ Unu hukwa petuse, baa ka sake-wi bakaanoho. ³⁸ Soo Te Pabe'e ka sake oonnakwa habeno'o tu mi tzopedanena, atasoo u'wedape. Mu oo nakatzimodu suina, yise oo netupoonnese, mee oo netamma, "Ha'yoo u ne soobedya? How sakwa u ka ne badatu'ihoo?" ³⁹ Soo Te Pabe'e ka hukwapa noko baa yadooese, "Obeda sapa," mee unne. Gi hukwa manise, gi hee yutsungapunne.

⁴⁰ Soo Te Pabe'e ka umu tunakatzimodu meeo netamma, "Mu sakwa gi unu su'ipana, gisoo mu nuka togesoobedya." ⁴¹ Umu yise meeo nananetamma, "Haga esoo nana? Soo hukwapa ka baa-no a nakabetsea."

5

¹ Soo Te Pabe'e ka mu tunakatzimodu-no ka Gerase mee naneadu-kwitoo natzemange petuga. ²⁻⁴ Soo Te Pabe'e ka sake-wi'yoona tseboookase, sumu'yoo nana tsoapayidu oo tapoegea. Esoo nana ka tupe tawaga-wi nobe-ga'yoo mu tu'ipu nakoo-kwi. Ewasoo oo mi-no oo kowpa natzakunedi'yakwe. Nonotsa yise soo nana oo mesoo tzahanekwunihooyakwe. Gadoo'oo haga natzooedu oo wutama-wa'ne'yoo. ⁵ Soo nana nonotsa

tabeno, tooetoo togano, tooe hano tooe oona manennumme mu tu'ipu natuoota-kwi, tooetoo giba-nagakwi wa'agenumme, puusoo ka tupe-ma natzebokana. ⁶ Oosoo yise ka Te Pabe'e poonnese oo-baa tanomanepetuoo. ⁷⁻⁸ Soo Te Pabe'e yise meeo oo netamma, "U tsoapa mana-ga'yoo tse-booegea." Soo tsoapa yise meeo oo netamma, "How yise u nukadooe? Numme u sopedakwa-too. U Jesus, Numu Manumudoopu Too'a. Gi numme makadoo'ookupana." ⁹ Soo Te Pabe'e ka nana meeo tubenga, "Ha'yoo u nane'a?" Soo tsoapa oo nanekwege'a, "Ka ewa'yoona numme, numme ewa nanane'a." ¹⁰ Umu tsoapa ewana meeo oo netamma, "Gi ne tayapana ekow teepu-koobakoo."

¹¹ Ewa'yoo mu hogu ka giba-kumaba tuka kon-nomo'o. ¹² Umu tsoapa yise meeo ka Te Pabe'e netamma, "U sakwa mu hogu-nagatoo ne taya." ¹³ Soo Te Pabe'e yise meeo mu netamma, "Muu-soo too'e." Mu tsoapa yise ka mu hogu-naga mani. Mu hogu ka banunadu-kwi badatu'ihoo. ¹⁴⁻¹⁶ Mu naana yaatu, mu hogu mabetseadu ka mu hogu badatu'ihoose, mu naana nana'emota tatanomane, ka mu numu yise tuukwe'e. Umu no'yoona kemmase oo poonne. Pudusoo yise ewa'yoo numu ka Te Pabe'e-baa mani petu. Soo nana soonamme-kwitu besa manese, oosoo yise onow katu, tu hekwi namasooana. ¹⁷ Ewa'yoo mu numu ka Te Pabe'e-ma nasoosuina yise oo tayakwuna'e.

¹⁸ Ka Te Pabe'e ka sake-wi tsebooedyakwe, soo nana ka Te Pabe'e meeo netamma, "Nu u-no meakwu." ¹⁹ Soo Te Pabe'e yise meeo ka nana

netamma, “U sakwa gi nu-no meapana, u sakwa u nanumu-witoo kodyu. Te Naa besa ume tumadukugana mu tuukwe.” ²⁰ Soo nana yise kodyuka, ka teepu Sumumano (10) mee naneadukwitoo. No'yoona mu numu oo nakadu besa nakasokwama.

²¹ Soo Te Pabe'e ka banunadu mana-kwi nummese, ewa'yoo numu oo-baa manega'a. ²² Oosoo nana mu nanesootuhidu nematugudu, Jairus mee naneadu, ka Te Pabe'e-kobena meatzedo petuse ²³ mee oo netamma, “E padu unu tuoeya'e. U sakwa yabe kemmase, oo-kooba pooha matuguse, oosoo sakwa besa manese, besa nuumma.” ²⁴ Soo Te Pabe'e yise oo-no mea. Ewa'yoo numu umu-no oo takoo'negea'a.

²⁵ Sumu'yoo mogo'ne hoone tuoeya'edu sumumano wahamatsebooeekudu (12) tommo petuga. ²⁶ Mu poopooha-ga'yoo gi besa oo mayugwe. Oosoo yise no'oko tu hemma tzasoo'a petuga. Nahanobasoo manemena, yise hanobasoo manepetuga. ²⁷ Oosoo yise ooka Te Pabe'e-witu nakase, oo oonakwana oo kwasu tzamow, mee tosoohanena, ²⁸ “Nu sakwa oo kwasu sukwe tzamase, besa mane.”

²⁹ Ka oo tzamase, soo oo puuhana yise pasahoo. Oo tookoo yise no'yoona besa nuumma, ka besa manese. ³⁰ Soo Te Pabe'e yise yabesoo tu pooha-matu yaahoose, oo sopedakwatoose umutamme nakwumunase, yise meeo unne, “Haga e tzamow?” ³¹ Umu oo nakatzimodu meeo oo netamma, “Ewa'yoo numu u takoo'napunne. U yise meeo, ‘Haga e tzamow?’ ” mee. ³² Soo

Te Pabe'e yaatu poohnamoo'ase, oo poonne ka oo manedu.

³³ Oosoo mogo'ne yise su'ise kwebewunu. Ka tu manena sopedakwatoose, o'no yise ka Te Pabe'e-matoo kemmase oo nanekwahakute. ³⁴ Soo Te Pabe'e mee oo netamma, "U ka e naka'oedyukuna besa manese, saa'a mea."

³⁵ Ka Te Pabe'e togesoo yadooawunu, oona ka Jairus nobe-wi'yoona kemmadu meeo tuukwe'e, "U padu ya'eoo, gi ka Jesus u nobe-witoo bipana. Nagutza saa'asoo." ³⁶ Soo Te Pabe'e oo nakase ka Jairus mee netamma, "Gi su'ipana. E nakabetsea." ³⁷ Soo Te Pabe'e yise ka Jairus-no oo nobe-witoo memeakwate. Peter, James, John suu'mu umu-no ka Jairus nobe-witoo mea'a, meeo susumudu nakatzimodu mu netamma, "Gi kemmapana numme-no." ³⁸ Ka oonow mu petugase mu numu ewa'yoona sakwa'e. ³⁹ Soo Te Pabe'e yise ka nobe-wi egease, meeo mu netamma, "Gi sakwipana. Esoo tsea'a gi ya'e, sukwe u'we." ⁴⁰ Umu oo-ma'yoo naneko'e. Soo Te Pabe'e yise puuwanatoo mu taya. Ka tsea'a naanapua'amu-no ka umu punotu bina ka tsea'a habe-kwitoo mea'a. ⁴¹ Soo Te Pabe'e yise ka tsea'a-matoo takwuese, oo mi-ma tzakaduse, meeo oo netamma, "Yotseoo." ⁴² Soo tsea'a wahamatse-boekute (12) tomopu, yise tuponnese, yabesoo yotseoose, wununnumme. Mu numu otu oo poonnedu hayoo sapa sokwamahoo. ⁴³ Soo Te Pabe'e ka tsea'a naanapua'amu meeo netamma, "Hemma manatu a maka." Soo Te Pabe'e meeo mu tunetammakute, "Gi haka tuukwepana kayoo e tumadukuse."

6

¹ Soo Te Pabe'e umu tu nakatzimodu-nosoo ka Jairus nobe-wi'yoona tu nanumu-witoosoo kodyu petuga. ² Ka nanesootuhi tabeba oo manepetuse, soo Te Pabe'e numu-baa nanesootuhi petuga, ka mu numu besasoo Te Naa-witu tuukwe'e. Ewa'yoo numu oe oo nakapunne, meeo nananetamma, “Soo Jesus besa yadoo, pana oosoo tamme-nagatusoo. Ha'oo yise esoo Jesus ka ekow yoonnekoo nageapu, Te Naa-witu tu sopedakwadoona? ³ Esoo nana uga nobe-doodu yise yaa meno'o unu tu pooha-gana te tzapoonnekute. Tamme oo sopedakwadoo, oosoo Mary tooa. Mu James, Joseph, Judas, Simon yise oo wanga'amu. Yise oo punne'emu yow tamme-naga.” Yise umu gi ka Te Pabe'e naka'oedyukute.

⁴ Soo Te Pabe'e mee mu netamma, “Ka yaa teepu-koobatu mu numu ka Te Naa yadooawabe naka'oedyukudu, yise umu oogowsoo nanumu, oo nonopua'amu-no gi.” ⁵ Soo Te Pabe'e ka mu susumudu numu tuoegoedu-ma matuoona yise mu mabesaku. Huutse'yoo numu namabesaku, umu ka gi tunaka'oedyukuna. ⁶ Te Pabe'e tutuha tu nanumu soobedya ka mu too'e tuukwese sapa, gi pumme mu naka'oedyukute.

Soo Te Pabe'e yise oona tzatzage'e-kwisoo nanesootuhibu numu tunedyooennumme.

⁷ Soo Te Pabe'e yise mu wahamatsebooe kudu (12) tu nakatzimodu bise, meeo mu netamma, “Nu mu pooha-makakwu, puma tsoapa mu nematzagakwunikwuna. Wakwaha'yoona saa'a gi hemma hemapana memea. ⁸ Gi nadukadu

tunopana, gi mago'o, gi puma hemma mu tumukwuna tuwazoo hemapana. ⁹ Gi waahoo kwasu hemapana. Sumu-kwisoo tanegeana tuwow. ¹⁰ Ka mooe'ugasoo tunaka'oedyukudu nobe-wi egease, ooweoo umu-baa tooi, gi oonatooe tooin-nummepana. ¹¹ Yise ka mu numu gi mumme naka'oedyukudu gi mu nobe-wi egeapana. Ka kooseba mu moko-matu tata'nese, oe'yoona saa'a memea. Mu numu tzapoonneku how suta'yoo tookwa umuoo numu."

¹² Mu tunakatzimodu yise mea'ase, meeo mu numu tuukwe me'a, "Gi suda manepana." ¹³ Yise ewow tsoapa nematzagakwunimena. Ewa'yoo mu numu tuoegoedu yoohoo, namagunana besa manakwe.

¹⁴⁻¹⁶ Ewa'yoo numu ka Te Pabe'e-witu nesoo bedya. Susumudu numu meeo, "Masoo sumuna soo John numu baa-wi matzakadu, tuusootabuese, unu poohadoo." Susumudu numu meeo ooso ka sumuna Elijah. Susumudu punno'o meeo, "Ooso Jesus ka sumuna Te Naa-witu wahadu."

Mu numu pabe'e Herod mee naneadu, ka Te Pabe'e-witu nakase, yise meeo, "Nu tukwutumadu ka John batsa tuungu. Ooso yise sumuna tuusootabuepu?" ¹⁷ Ka o'nosoo, soo Herod tu pabe'e nodukwa nodukwadoo, soo mogo'ne Herodias mee nane'a. ¹⁸ Soo John ka Herod meeo netammano'o, "Gi toge u manakwe, gi ka Herodias nodukwadoopana."

¹⁹ Soo Herodias unu sutana ka Herod ka John too'e batsa tuungu. ²⁰ Soo Herod yise ka John tu batsakwu-ma unu sua'e, ka John nanesootuhidu

nana. Mu tukwutumadu ka John wutumow. Soo Herod besa ka John nakasoobedya pana oo yadoo-a ma nakasua'e.

²¹ Yise gea'a soo Herod tu nadoo-a'adoono'o tabeno mu numu papabe'emu-no ewa tuka. ²²⁻²³ Herodias padu tukawunuse yise mu numu nugakute. No'yoona yise oo nugana besa soobedya. Soo Herod mee oo netamma, "Hemma u? Tooe hemmadoo-e u soogwina nu u gea'akwu."

²⁴ Soo tsuadumu tu pea tubenga, ²⁵ "Hemma sakwa yise nu natuungu?" Yise soo oo pea meeo oo netamma, "Ka John koota tsekowse, ka oo wo hanese, yise tseda-wi oo wuuna." ²⁶ Soo Herod oo nesootu'adya'e ka oo batsa tuunguse, ewa mu numu oo unnena naka. ²⁷ Herod yise ka mu tukwutumadu ka John koota tsekea'a tuungu, ²⁸ ka oo wo tseda-wi oo wuunase, ka Herodias yise yongagea. ²⁹ Mu John nakatzimodu oo nakase yise oo tookoo tugudoo-a.

³⁰ Umu Te Pabe'e nakatzimodu oo-baatoosoo kodyuse, ka Te Pabe'e no'oko ka tu manemopuwitu oo tuukwe. ³¹ Soo Te Pabe'e meeo mu netamma, "Tamme sakwa gi haa'no songapan-gapunne." Ewa'yoo numu pooha namagunana meagonno, gi tu tuka-ma sokwamana manegonno. ³² Soo Te Pabe'e yise umu tu nakatzimoduno ka sake-wi, gi numu pumme poonne-kwitoo mea'a.

³³ Mu numu mu mea'ase, mu poonne. Ewa'yoo mu numu mu posoopedakwadoona oo nanatuukwe ka baa-kumi mu mea tu no'ata-kwi'yoona umu yise oo-baa sogo tatanomanepetuga.

³⁴ Soo Te Pabe'e yise ka sake-wi'yoona wue petuga ka baa-kumabato, ewa'yoo mu numu o, pukwi oo petuga-kwi. Mu numu sukwe mukwadu-kwa'ne mu posoobedyana, mu sootuhina yise mu tunedyoo'e.

³⁵ Yabesoo yise taba egaga'a, ³⁶ mu tunakatzi-modu ka Te Pabe'e meeo netamma, "U sakwa mu ta'ya ka kwaya'yoona mu kemma'ase. Umu sakwa puusoo tu tukakwuna hownnekoo mayu." ³⁷ Soo Te Pabe'e yise meeo mu netamma, "Hemma sakwa tamme mu maka?" Mu tunakatzi-modu yise meeo, "Numme haa'a ka tukapu tumukwu? Ewa'yoo numu yaatu. Hanoko sakwa yise numme ka tukapu mu mayuku?" ³⁸ Soo Te Pabe'e yise meeo mu netamma, "Huuho mu tukaba-ga'yoo? Mu sakwa oo poonnetooa." Ka saa'a umu tunakatzi-modu meeo oo netamma, "Manegeoo numme tukaba-ga'yoo. Yise waahoo tuwazoo numme pakwe-ga'yoo."

³⁹⁻⁴⁰ Soo Te Pabe'e meeo ka mu tunakatzi-modu, "Maa poohega-kooba sapa mu numu aata tuungu. Yoode'a, mu sakwa mu toonooba-wisoo aata." ⁴¹ Soo Te Pabe'e yise ka mu aatahoose, ka tukaba, noko pakwe hemahoose, toogoopadu poonnese, nanesootuhikooha. Yise ka tukaba noko pakwe tzaokase, umu pumme nakatzi-modu, mu ewow numu maka tuungu. ⁴²⁻⁴⁴ Yise ewow numu maka (5000 nanana). Ka nanesootuhina ka tukaba noko pakwe toge'yookwunu ka mu numudoo negwa'e, umu yise ewa tukase, no'yoona wutzu'me. Mu Te Pabe'e nakatzi-modu yise ooka pakwe, noko tukaba nagupenina ka wahamatseboekudu (12) kawono, oo-ma kaanoku.

⁴⁵ Soo Te Pabe'e yise umu pumme nakatzimodu meeo netamma, “Mu sakwa ka sake-wi kodyu, ka banunadu natzemangegase, yise ooka Bethsaida mee naneadu-kwitoo kodyuka. Mu numu ewana yise nu tayakwu.” ⁴⁶ Yise ka mu mea'ase soo Te Pabe'e ka giba-matoo mea, ka nanesootuhikwuse.

⁴⁷⁻⁴⁸ Ka yongona, ka sake-wi ka banunadu banaamoo-kwitoo, soo Te Pabe'e no'oko mu poonne. How gi besa natzemange, ka kwenahadu unu hukwawunu. O'no awamooasoo tu tabu'agena, soo Te Pabe'e ka banunudu-koobakwi kemmaka'e. Soo Te Pabe'e yise umu moopa too'e meahoo. ⁴⁹⁻⁵⁰ Mu tunakatzimodu oo poonnese unu suise, yise wa'agemo'o, “Uda tsoapa.” Soo Te Pabe'e mu yadooe, “Gi suipana. Nu yaahoo.”

⁵¹⁻⁵² Ka sake-wi umu-baa tsebooe, yise soo hukwapa kadoo manigea'a. Umu oo nakatzimodu gi gea'a oo pooha manena nakasopedakwadoona ka manegeoo tukaba nagoohanena, waahoo pakwe tuwow. Ka ewow numu oo makana poonne pana gi oo soo'oedyukute.

⁵³ Ka Gennesaret mee naneadu-kwi umu natzemange petuse, tu sake o tzakuna, ⁵⁴ oe'yoona yise sawe. Mu numu ewana nosumuna ka oo nesopedakwatoona ⁵⁵ oo nanatuukwe. Umu nanatuukwewunudu, mu tuoegoedu, mu nuummadu oo-baa bi petudyakwe. Susumudu oo-baa natza-hedape petu. ⁵⁶ Umu yise Te Pabe'e kwasu-matu tzamase, no'yoona besa mane.

7

¹ Mu Jew numu nananesootuhipe papabe'e numu tunedyooedu ka mu Pharisee mee

nananeadu-nagatu kemmana, ka Jerusalem mee naneadu-kwi'yoona kemmase, ka Te Pabe'e-baa.
² Umu ka Te Pabe'e nakatzimodu poonne, umu gisoo mabatzagapana tukagonno. ³ Umu Jew-no Pharisee tumayohope-wi umu gi tuka ka gisoo mabatzagana ka tu nanamooatupu tumayohope.
⁴ Umu ka hano mose tu tootsa mabatzakwuna'e. Tu tseda, pukwikoo tu saakwuna, batzakase oekoo saakwu. Ne nanamooatupu mee ne tunetammakuna, numme yise oo mayoho.

⁵ Umu Jew tuukwewabe, mu Pharisee-no, ka Te Pabe'e meeo netamma, “Mu u nakatzimodu sagwane ma'emukwapu-ga'yoo, gi tu mi mabatzakapana tuka. Umu te nanamooatupu ka tu nanumu meeo netamma namabatzakase yise tuka.” ⁶ Soo Te Pabe'e yise meeo mu netamma, “How yise mu ka te nanamooatu besa nakana, gi Te Naa tuukwewabe naka? Soo Isaiah, ka mumme nemooagaduwitu meeo unnepu.

‘Mu ka Te Naa nakabetse'a mee mu naneyakwe.’
 Soo o'nosoo Te Naa yadooawabe togesapa mu netamma ka mee tubotuguna.

‘Umu numu meeo unnepana mu tupa apeakana, gi mu tubetse sokwamana. Umu ka Te Naa gi nakabetse'a. ⁷ Umu ka Te Naa-matoo nanesootuha'e mee sukwe naneyugwepana, ka mu numu aata-tammesoo ne'emukwakute, ka pummesoo tusooyugwena mu numu ewana mee netamma, “E nakapunne pummesoo tumayohope tumayoho o'no mu ka Te Naa nakabetse'a.” ’

⁸ Umu mee'e mu nanamooatu mu Te Naa unnepu-wa'nesoo.” ⁹ Soo Te Pabe'e yise meeo mu ne-tamma, “Mu sakwa gi umu te nanamooatupu tuukwena naka'oedyukupana. Mu sakwa Te Naa suu'mu naka'oedyuku. ¹⁰ Ka mooasoo soo Moses meeo unnepu, ‘Te Naa noko ka numu tu naanapua'amu mabetsea tuungu. Soo tu naanapua'amu suda netammadu sakwa nabatsa.’ ¹¹⁻¹² Mumme putoogoo mooa tumayohona pana mu meeo, tamme sumuna ka mu naanapua'amu mee ne-tammakwu, ‘Nu ka Te Naa God tummatzi, gi umu e naanapua'amu tummatza'e.’ Mu gi besa ka mu naanapua'amu matugu, ka oo tumatuguna. Mu ka Te Naa tunetammana takopa, ka mu te nanamooatupu tumayohope ooosapa nagen. ¹³ Ewa'yoosoo te nanamooatupu unnepu mu numu ka gi besow tunedyooe, tamme sakwa ka Te Naa tuukwena suu'mu naka'oedyuku.” ¹⁴ Soo Te Pabe'e yise meeo mu ewa-kwikoo mu numu netamma. ¹⁵⁻¹⁶ “Mu sakwa e nakasopedakwatoo, soo hemma mu tukana gi hownne'yoo, Te Naa-nakwana. Soo suda te tumatuguna yise gi besa te soonammena yugwe, umuoo soo Te Naa gi petzape,” mee.

¹⁷ Ka nobe-wi'yoona mu tunakatzimodu meeo ka Te Pabe'e tubenga, “Ha'yoo u ka mu numu tuukwepu?” mee. ¹⁸⁻¹⁹ Soo Te Pabe'e meeo mu nanekwege'a, “Mu sakwa o'nosoo e nakasopedakwatoo. Soo tooe hemma tooe te tukana gi hownne'yoo Te Naa-nakwana. Soo tukapu gi atasoo numu yugwe-wa'ne'yoo. Soo tukapu numu-nagakwi sukwe meadu.” Soo Te Pabe'e yise te tzapoonnekute tooe hownne'yoo

numu tukapu besa'yoo. ²⁰ “Ka suda te tumatuguna soo Te Naa gi petzape. ²¹ No'obatusoo suda te tusooyugwena, tuduhana, tubatsana, ²² moogoobuna, numu mooagana, numu nowuakuna. Kumma'akusoo nasoodyagena, numu nesootzemana, besa nasooyugwena, ²³ ooonnekoo soo Te Naa gi petzape.”

²⁴ Soo Te Pabe'e yise oona tubewa-wi, Tyre mee naneadu-kumaba, ka nobe-wi watze petuga, gi haga oo sopedakwatoo. Mu numu puusoo yise oo mayuoo.

²⁵⁻²⁶ Yise sumu'yoo wawa'a mogo'ne oo-baa petu. Ka Te Pabe'e-witu nakase ka tu padu tsoapaya'e ooka oo nematzagakwuni tuunguna. ²⁷ Soo Te Pabe'e yise oo nemapoonnena mee oo netamma, “Gi nu wawa'a sootummatza'e. Nuga nanumu suu'mu sakwa nu tummatzi. Numme Jew mu wakwawa'a sadu'u mee ne'a. 'Yoo manepunne mu numu puu gi tu dooamu tukakwuna tu sadu'u maka.” ²⁸ Soo wawa'a mogo'ne yise mee oo netamma, “Mu te dooamu puu tu tugupenina sadu'u maka. U sakwa nuga padu mabesaku u nanumu too,” mee. ²⁹ Soo Te Pabe'e yise ka wawa'a mogo'ne meeo netamma, “Aha, besa'yoo u ka meeo unnena, nu u tummatzikwu. U nobe-witoo kodyuka ka tsoapa nu mooasoo nematzagakwunipu.” ³⁰ Soo mogo'ne ka kodyu petugase, ka tu padu besa manepu, ka tu kapa-kooa oo habennumme oo mayuoo petuga.

³¹ Soo Te Pabe'e yise ka Tyre mee naneadu-nakwana kodyuna ka Galilee banunadu-witoo mea. Soo Te Pabe'e yise ka Sidon mee naneadu-toogoo me'a. Ka teepu Sumumano'o Nogatudu

mee naneadu.

³² Onona mu numu ka Te Pabe'e-baa sumuoo nana bi petu. Oosoo nana gi nakatawagadu, gi besa yadooadu tuwazoo. Mu numu ka Te Pabe'e meeo netamma, "U sakwa namekoosoo u mi-makooba matuoonase, eka nana mabesaku."

³³ Soo Te Pabe'e yise ka nana bihooka mu numu ewanagakoo. Soo Te Pabe'e yise tu makoogoo ka nana naka-wi tsetuoonahoo. Ka tu makoogoo tu huutse-ma mobanase, ka nana ego-kooba tse-tugu. ³⁴ Yise soo Te Pabe'e togoopadu poonne. Nsongapose ka nana gi nakatawagadu meeo netamma, "Yise nakatawaga." ³⁵ Soo nana nakatawaga manese, besa yadoo mani.

³⁶ Soo Te Pabe'e yise meeo mu numu netamma, "Gi sakwa mu haka tuukwepana," pana mu numu gi oo nakabetseana oo nanatuukwe'e.

³⁷ Umu meeo, "Uune! Soo Te Pabe'e unu tumada'e. Soo Te Pabe'e ka mu gi nakatawagadu nakadage ma'eyakwe, mu gi apegeadu besa apegea maneyakwe."

8

¹ Mu numu ewana sumuna tusooase, gi hemma tuka, soo Te Pabe'e meeo mu tu nakatzimodu netamma, ² "Nu suda umu numu nuummakute, ka pahe tabeno gi hemma mu tuka, umu tseago'e. ³ Nu ka nobe-witoo mu tayase, umu sumuna tsuawumehoekwu, umu-matu ka kwinga'a kemmase." ⁴ Umu oo nakatzimodu yise meeo oo nanekwegea, "Ka tubetse numu-wana'yoona hownnekoo tamme ka nadukatu umutoo mayukwu?" ⁵ Soo Te Pabe'e yise meeo mu tubenga, "Haa'noko mu tukaba-ga'yoo?" Mu oo

nakatzimodu yise meeo, “Natakwatsukwu'yoo (7) tukaba.” ⁶ Soo Te Pabe'e yise mu numu meeo netamma, “Ma teepuna sapa aatapunne.” O'no yise ka tukaba hanese, oo-koobattoo nanesootuhise oo tzabokase, mu tu nakatzimodu mu numu ooka haneku tuungu, umu yise ka tukaba mu numu ewana haneku. ⁷ Umu yise tuwazoo huutsekoo tutugutzekoo pakwe-ga'yoo; ka pakwe tuwazoo nanesootuhikuse mu tu nakatzimodu mu numu haneku tuungu. ⁸ Mu numu yise ka tukase wutzumeoose, ka tunakatzimodu natakwatsukwuoo (7) kawona-witoo ooka a nagupenina tzoba. ⁹ Tubetse ewa'yoo (4000) numu o. ¹⁰ Soo Te Pabe'e yise mu numu nobe-witoo taya. Yabesoo yise ka tu sake-wi mu tu nakatzimodu-no kuowse onona ka teepu Delmanutha mee naneadu-kwitoo mea'a.

¹¹ Mu Pharisee ka Te Pabe'e-baa petugase oo nesootzemana mee oo netamma, “U sakwa mee tzapoonneku ka Te Naa Poocha-matu u hee-gana.”

¹² Soo Te Pabe'e yise mu nasoomenakwana, mee ka mu gi tunaka'oedyukudu netamma, “Mooasoo nu mu tzapoonnekuse sapa, mu gi oo soo'oedyukute. Nu gi mu tzapoonnekukwu, ka e poocha-gana.” ¹³ Oosoo yise ka mu tunakatzimodu-no, ka mu Pharisee-baa'yoona mea'ase ka sake-wi tzoonoase ka baa natzemangeka.

¹⁴ Umu oo nakatzimodu ka baa natsemanegase ka tu tukuba soomu'waka. Sumuoosoo tukaba yise tuno'o ka sake-wi. ¹⁵ Soo Te Pabe'e yise meeo mu netamma “Ka mu numu yadooedu namayuadu tukaba gi soogwipana.”

16 Umu oo nakatzimodu yise gi oo nakasopedakwadoona yise meeo nananetamma, “Soo Te Pabe'e te nesootze'ma ka tukaba te soomu'wakuse.” 17-18 Soo Te Pabe'e ka mu nakasopedakwadoose meeo mu netamma, “Gi suipana ka gi tukuba-gana. Mu gisoo e pooha nakasopedakwatoo. 19 Mu ka sumuna oo sooma'yu nu manegeoo tukaba-koobattoo nanesootuhi, oo ewakwuna soogwina. Nu yise ewow numu (5000) maka. Huoo kawona-witu ooka a nagupenina umu numu tzobahoo?” mee. Sumu'yoo mu oo nakatzimodu yise meeo oo nanekwegea, “Wahamatseboookudu (12) kawona-witu,” mee. 20 “Nu yise tuwow ewowsoo (4000) numu maka, natakwatsukwuoo (7) tukaba-gana, mu yise ewowsoo tuwazoo hane, ka a nagupenina. Huoo kawona-witu ooka a nagupenina umu numu (5000) tzobahoo?” Sumu'yoo mu oo nakatzimodu yise meeo oo nanekwegea, natakwatsukwuoo (7) kawona-witoo mee. 21 Soo Te Pabe'e yise meeo unakwe, “Mu gi e nakasopedakwatoo, mu tuwazoo gi e naka'oedyukute.”

22 Umu yise ka Bethsaida-wisoo kodyu petu. Susumudu numu ka Te Pabe'e-matoo gi tubootabuedu tsaka petu. Umu meeo ka Te Pabe'e netamma, “U sakwa eka nana, gi tubootabuedu-ma matuguse a mabesaku.” 23 Soo Te Pabe'e yise oo tsakakase oo poee-witoo tooheoo. Yise o-kooba matuoonase, meeo oo tubenga, “U haa'a tooe besa tubooha'e meno'o?” 24 Soo gi tubootabuedu mee oo nanekwegea, “Nu meno'o yaatu poonnepana, ka mu numu-

ma sogomeadu, sunngabe-kwa'ne posoobedya.”

²⁵ Soo Te Pabe'e oo pooe-kooba matuoonasoo, soo gi tubootabuedu besa manise besa tuboohwa'e.

²⁶ Soo Te Pabe'e meeo oo netamma, “U sakwa kaaheno nobe-witoo mea, gi numu tuukwepana.”

²⁷ Soo Te Pabe'e yise mu tunakatzimodu-no ka Galilee-wi'yoona mea'a, ka Caesarea Philippi mee naneadu-kwitoo. Onow po-kumi sogo meana meeo mu tubenga, “Hayoo mu nu-witu naka?”

²⁸ Umu oo nekwegea, “Susumudu numu meeo u ka sumuna John baa-wi numu matzakudu. Susumudu numu meeo u ka sumuna Elijah. Susumudu punno'o meeo u ka sumuna Te Naa-witu wahadu.” ²⁹ Soo Te Pabe'e mu tubenga, “Hayoo mu nu-witu sooyugwe?” Soo Peter oo nekwegea, “U Te Tubetse Pabe'e,” mee. ³⁰ Soo Te Pabe'e meeo mu netamma, “Gi e wahapana, nu yow Mu Pabe'e.”

³¹ Soo Te Pabe'e yise meeo mu tunakatzimodu tuukwe, “Mu numu yadooakudu gi e petzape, unu nananuumadu e wumakuse, e bat-sase, o'no yise pahe tooise saa'a nu tuusootabooodoa.” ³² Soo Te Pabe'e toge kaaheno meeo unakwe. Umu oo nakase soo Peter yise ka Te Pabe'e oetu meeo watze tunesoobedyakute, “Gi soo hee oo manepunne. Gi umu u batsa.” ³³ Soo

Te Pabe'e yise mu tunakatzimodu-matoo kodyuse meeo ka Peter netamma, “Gi meeo unnepana. Oosoo Suta'yoo u ne'emukwawunu. U sukwe numu soonamme-kwa'ne tusooyugwe, gi ka Te Naa soonamme-kwa'ne.”

³⁴ Soo Te Pabe'e yise no'oko mu numu, ka umu tunakatzimodu-nokosoo mee mu netamma,

“Tooe haga tooe nu-wi tunaka'oedyukudu sakwa mee unne oosoo gi hownne'yoo, tooe mu ka nu-koobattoo nabatsase sapa, mu e nagenokwu. ³⁵ Tamme ka tammesoo too'e namagwetzoina tamme kadoo'oo namayugwekwu, mu ka nu-koobattoo kadoo'oo mesoo namayugwena mu namagwetzoikwu. ³⁶ Tamme ka teepu-kooba'yoon ewow hee-ga'yoo pana ka te ya'ese oosoo gi te magwetzoi-wa'ne'yoo. ³⁷ Gi oosoo te gwetzoina tumu-wa'ne'yoo. ³⁸ Tooe haga tooe nu-ma nasookwina, noko e unnepu tuwazoo, nu yise punno'o, saa'a mu-ma nasookwikwu, ka Te Naa pooha-toohakwi e petuse, ka toogoopadu e tutummatziwabe mu toha kakasa-gakoo-no.”

9

¹ Soo Te Pabe'e yise meeo mu netamma, “Nu togesapa mu tuukwepu susumudu mu yaa konnodu gisoo tuina, e pooha-gana poonnekwu.”

² Oona ka sumuna sumu natakwatsu (7) tooise oosoo Te Pabe'e tu pupua'amu bikase, oona ka pa'a giba-ma'yoonananesootuhi-ga. ³ Ka togesoo oo nanesootuhiwunu soo pukwi oo namasooana atasoo tapu'a, besa toha patakwet-seawunu. ⁴ O'no yise waha'yoo nanana oo-baa petuoo, Elijah-no Moses mee'e nananeadu umu nanano yise yadoo'a. ⁵ Soo Peter yise meeo ka Te Pabe'e netamma, “Besa numme ka kemma'ase. Numme sakwa piho mu tatza nobe-tooku. O'no mu ka Elijah noko Moses-no susu'muoo,” ⁶ mee unne, ka gi tu unnena sopedakwadoona ka unu suise. ⁷ Togesoo oo yadooawunu soo koomeba umu-kooba habaga petuoo. Te Naa yise ka

koomeba-naga'yoona yadooakooaha. “Yow esoo nuga Besaa Tooa, mu sakwa besa a nakabetsea.”
8 Soo Te Pabe'e suu'mu yise umu-baasoo. Mu Elijah-no Moses kadoo'oo.

9 Soo Te Pabe'e tu nakatzimodu-no ka giba-ma'yoona sawekese meeo mu netamma, “Gisoo haka tuukwepana, ka mu poonnena. Ka kadoo e manese yise e yotsese, o'no suu'mu saa'a mu numu tuukwe.” 10 Mu oo nakatzimodu yise ka Te Pabe'e nakase gi oo waha, pana yise meeo nanatuubenga, “Ha'oo manena meeo unakwe? Te Pabe'e haa'a ya'ese yise pudu yotsekwu?” 11 Umu yise ka Te Pabe'e meeo netamma, “Umu Te Naa yadooawabe meeo unakwe, Elijah mooe petukoo, o haa'a togesapa numme natuukwe'e? O'no yise haa'a Te Pabe'e mu nakwi saa'a petudooa?” 12 Soo Te Pabe'e yise meeo mu netamma, “Aha, meeo tubetse nabotugu. Mooe'ugasoo soo Elijah ka mu numu mooe tunesootabue petukwu. Nu yise oo-penakwa petuhoose suda punno'o namatugukoo. 13 Mooasoo soo Elijah mooe kemmapu. Umu numu yise tooe how tooe ka Elijah yugwe, ka a nabotugu-kwa'nesoo.”

14-15 Soo Te Pabe'e yise tu pupua'amu-no ka mu tunakatzimodu-baasoo kodyu petu. Mu numu ewana ka Te Pabe'e poonnese besa sokwamase oo-tamme tatanomanega. Mu nananesootuhidu tuukwewabe, ka Te Pabe'e nakatzimodu-no mooasoo mu nanepetukute oe petuoo. 16 Soo Te Pabe'e yise meeo mu tubenga, “How manena umu nananepetukute?”

17 Sumu'yoo nana ka Te Pabe'e meeo netamma, “Nu e tooa'a u-baa too'e hane petu u

kadoo'ookoosoo. Oosoo tsoapayaena gi besa yadoo'a. ¹⁸ Tooe hano'yoona tooe, soo tsoapa ooma tabu'ana soo e tooa ya'eookayakwe. Nu umu ume nakatzimodu, ooka too'e nematzagakwuni tuungu. Umu gi oo mabu'a."

¹⁹ Soo Te Pabe'e meeo mu netamma, "Mu gi e nakabetse'a, tooe nu wuna'me yaa mu-pa'yoopana mu gi e naka'oedyukute. Ka naatse tzakowke."

²⁰ Soo naatse ka Te Pabe'e poonnese ya'ehooka.

²¹ Soo Te Pabe'e meeo, "Haa'no wuna'me soo naatse 'yoo manenumme?" Mee soo oo naa, "Tuha'a manakwanasoo. ²² Susumudu soo tsoapa ka naatse too'e soobatsana goso-witoo oo wunapuyakwe, baa-witoo tuwazoo. U pooha haa'a ne sootuhi-wa'ne'yoo? Ne mesoo tummatza'e haa'a?"

²³ Soo Jesus yise oo nanekwegea, "U dea'a mooa-soo e pooha-gana sopedakwatoo. Nuka u toge soobedyase, o'no nu u tummatzikwu." ²⁴ Soo nana meeo, "Sagwane nu u naka'oedyukute, pana unusoo ume e naka'oedyukuna nu sookwa'e."

²⁵ Gisoo mu numu ewana petu, soo Te Pabe'e ka tsoapa kwinga'atoo nematzagakwunise mee oo netamma, "Yaanona mea. Gi kodyupana ka naatse-matoo." ²⁶ Soo naatse paba yadooase, ya'eooka. Mu numu yise me'e, "Ya'ehoo haa'a?"

²⁷ Soo Te Pabe'e o mi-makoo oo tzadyota. Soo naatse besa manise yotseoo. Soo Te Pabe'e yise umu tu nakatzimodu-no, ka mu numu-baa'yoona mea'a.

²⁸ Ka nobe-kwi mu tzoonoase, umu Te Pabe'e nakatzimodu oo tubenga, "How manena numme gi oo nemabu'a?" ²⁹ Soo Te Pabe'e mu

nekwegea, “Oosoo yooonne'yoo tsoapayaedu nanesootuhibu-ma nata'yadu.”

³⁰ Galilee-too umu watze mease ³¹ soo Te Pabe'e yise umu tunakatzimodu tuukwega'ase meeo mu netamma, “Mu nuka wohonedu nu-ma tza-kaduse, e batsase, saa'a nu pahe tabemease tuu-sootabuedooa.” ³² Umu oo unnepu gi nakasope-dakwatoo, pana umu ooka tu tubengakwuna-ma sua'e.

³³ Ka mu tunakatzimodu ka Capernaum-wi petugase, ka nobe-kwi'yoona soo Te Pabe'e mee mu tubenga, “Hekwitu mu nehane mu ka kem-mana?” ³⁴ Mu Te Pabe'e nakatzimodu yise gi ka Te Pabe'e nanekwegea, ka numu oonakwa besa-kwitu nehanena, “Soo tooe haga umu-nagatu ka mu oonakwa besa'yoona oosoo ka Te Naa-baato mooe meakoo.” ³⁵ Soo Te Pabe'e yise no'oko mu tunakatzimodu nabatoo bise meeo mu netamma, “Soo tooe haga tooe numu-kobena soo nadat-sungadu, sakwa no'oko numu sumu-nakwi'yoona numu tummatzino.” ³⁶ Soo Te Pabe'e yise tutsekoo tuha'akoo umu-baato bise, meeo mu netamma, ³⁷ “Mu ka tuutsekoo tuha'akoo nu-koobatoo besa soobedyana, mu tookwa nuka besa sobedya tuwazoo.”

³⁸ Soo John ka Te Pabe'e meeo netamma, “Ka nana ka tsoapa nematzagakwunidu, numme poonne. Tooe oosoo nana gi numme ume nakatzimodu-matu pana u nanea-ma ka tsoapa nematzagakwuni. Numme yise meeo oo netamma, ‘U sakwa gi ka Te Pabe'e nanea-ma ka tsoapa nematzagakwunipana,’ ” mee. ³⁹ Soo Te Pabe'e meeo mu netamma, “Mu sakwa uga gi

meeoo oo netammapana. Oosoo ka e nanea-ma ka tsoapa nematzagakwunikwuse oosoo tookwa gi e nekwohonekwu. ⁴⁰ Oosoo besa e tummatza'e.

⁴¹ Tooe haga tooe ka e naka'oedyukuna tooe umu nuka tummatzidu bamagase sapa nu mu sukwe sootuhi meakwu."

⁴² Soo Te Pabe'e yise ka mu tunakatzimodu meeoo netamma, "Gi besa soo tooe haga tooe ka nuga dooamu ka gi togekoo podo mu tunedyoena. Nu sakwa puu sukwe badya'e, gi yise ka gi togekoo mu Te Naa dooamu tunedyoee.

⁴³⁻⁴⁸ Nu sakwa e mi sukwe tseka'a, gi ka suda namanedu mahane. Besa'yoo tooe ka sumuoosoo mi-geana Te Naa-baa petugase, gi waahoo mi-geana, ka niwunu-kwitoo wue. Nu sakwa e kuku sukwe tseka'agwuuni, gi ka gi togekoo podo mea. Besa'yoo tooe ka sumuoosoo kuku-gana ka Te Naa-baa petugase, gi waahoo kuku-gana ka niwunu-kwitoo wue. Nu sakwa tuwow e poee sukwe tsepata, gi ka gi togekoo poonnena. Besa'yoo tooe ka sumuoosoo poegeana ka Te Naa-baa petugase, gi waahoo poegeana niwunu-kwitoo wue, owetuoo oosapa nidabedu gi nimakwudu. Mu wo'abe yise oosapa mu tookoo soo'adape.

⁴⁹ No'yoona oowetuoo numu oo wumadoo.

⁵⁰ Ongabe puu ka tukapu besa makamakute, ka gi onga-gana gi hee besa kamma. Mu sakwa ongabe-kwa'ne'yoo. Mu sakwa besa nanapua'ana, besa sokwamamo."

10

¹ O'no yise ka tubewa, Judea mee naneadu-

kwi'yoona, soo Te Pabe'e ewow numu tunedy-ooe'e. Ka hooodu, Jordan mee naneadu baa mangega. ² Ewa'yoo tunesootzemadu numu, Pharisee mee nananeadu oo-baa petuse, meeo oo tubenga, "Besa'yoo haa'a soo numu ka nanodukwadoose, yise napoonnekwunina?" ³ Soo Te Pabe'e mee mu netamma, "Ha'yoo soo Moses ka mooo'asoo te tuukwe?" ⁴ Umu mee oo nanekwege'a, "Ka mooo'asoo soo Moses mee tubo'o, tamme ka napoonnekwunina sakwa tubope-ma napoonnekwuni." ⁵ Soo Te Pabe'e yise meeo mu netamma, "Te Naa gi meeo te netamma. Pana mu gi Te Naa nakabetseana soo Moses yise ekow mu tuukwe. ⁶ O'nosoo, soo Te Naa ka numu pudu manumudoose meeo, 'Nu ka nana noko mogo'ne manumudoopu. ⁷ Umu yise nanodukwadoose, soo nana tu naanapua'a-baa'yoona nomea. Tu nodukwa-no yise nobe-ga'yoo. ⁸ Umu yise sumuosoosoo numu-wa'ne'yoo. Gi waahoo numu-wa'ne'yoo.' ⁹ Soo Te Naa mee'e te netamma, 'Ka nodukwadoose gi napoonnekwunipana.' "

¹⁰ Ka nobe-kwi petugase, mu oo nakatzimodu ka a napoonnekwunipu-witu mee ka Te Pabe'e tubenga. ¹¹⁻¹² Soo Te Pabe'e mee mu nanekwegea, "Mu nanodukwa sakwa mesoo napoonnekwunipana, ka kumma'akoosoo nodukwadoose ma'emukwa."

¹³ Mu numu yise tu doodooamu ka Te Pabe'e-baa hane petudyakwe, umu oo nanesootuhiku tuunguna. Mu tunakatzimodu ka mu numu poonnena mu nesagwikute ka oo mu manakwe. ¹⁴ Soo Te Pabe'e ka mu poonnena meeo mu netamma, "Gi mu numu tu dooamu hane petudu

tayapana, gi mu nesagwikupana. Nu mu dooake sootuhise, umu yise ka Te Naa-baato meakwu.”

¹⁵ Soo Te Pabe'e yise meeo unakwe, “Nu kaa-heno mu tuukwekwu, mu mooe'ugasoo, nanek-wahakwu, tutugutsekoo dooake-wa'ne'yookwu gi ma'emukwadu. O'no yise mu ka Te Naa-baa petugakwu.” ¹⁶ Soo Te Pabe'e yise mu doodooake tzahedana, mu nanesootuhikuna, mu sootuhise umu-baa'yoona mea.

¹⁷ Sumu'yoo nana ka Te Pabe'e-baa tanomane petugase oo-kobena meatzedose ka Te Pabe'e meeo netamma, “U tubetse besa'yoo nana, ha'oo besa sakwa tuwow nu manese namagwetzoi?” mee. ¹⁸ Soo Te Pabe'e yise meeo oo nanekwegea, “U haa'a mee e netamma, u besa'yoo? Gi haga besa'yoo, Te Naa suu'mu besa'yoo. ¹⁹ U oo sope-dakwato ka Te Naa tamme tuukwepu; gi numu batsapana, gi numu nowuakupana, gi tuduha-pana, gi esayipana numu mane-witu, besa tu naa noko tu pea sooyugwena.” ²⁰ Soo nana yise meeo oo netamma, “Mooasoo nu tuha'yoona meeo na'unnedu nakabetseakena.” ²¹ Soo Te Pabe'e yise, ka ooka besa soobedyana mee oo netamma, “U sakwa no'oko u hemma-ma tumuse, ka u nahe-mena ka mu tutuha manedu hanekuse, o'no yise u ewow hee-gakwu, ka Te Naa-baa'yoona. O'no u yise nuka nakatzinnummekwu.” ²² Soo nana ka oo nakase suda soonamme ka ewow hee-gana.

²³ Ka nana mease, soo Te Pabe'e ka mu tunakatzimodu meeo tuukwe, “Soo ewow hee-ga'yoo numu unusoo manena namagwetzoikwu.”

²⁴⁻²⁵ Mu tunakatzimodu ka Te Pabe'e nakase punno'o meeo tutubenga, “Hownnekoo soo

numu yise mesoo namagwetzoa'e?" Pana soo Te Pabe'e meeo unakwe, "Soo numu gi puusoo namagwetzo'i-wa'ne'yoo. Soo Te Naa suu'mu mu magwetzoikwu."

²⁶ Mu tunakatzimodu mee oo netamma, "Kadoo'oo haga numu magwetzo'i-wa'ne tabu'a."

²⁷ Soo Te Pabe'e meeo mu netamma, "Aha. Te Naa suu'mu numu magwetzo'idu."

²⁸ Soo Peter meeo ka Te Pabe'e netamma, "Mooasoo numme no'oko ne hemma matusookwunikese, nanesootuhi mane." ²⁹⁻³⁰ Soo Te Pabe'e yise meeo mu netamma, "Tooe haga tooe tu nobe ma'wukadu, tu nanumu, no'oko hemma tu hee-gana, tu dooamu, tu tubewabe, ka nuka nagen a ewowsoo besa no'obatusoo nasootuhikwu, meno'o manekwana. Mu nasootuhikwuna gi moobegwagakwu. ³¹ Umu yaa'a teepu-koobatu meno'o numu moohedu, saa'a ka Te Naa-baa'yoona gi hee manepunnekwu. Umu meno'o gi mamaawa'ne'yoo, yaa'a teepu-kooba manepunnedu ka Te Naa-baa'yoona numu moohedooa."

³² Soo Jesus yise ka Jerusalem-witoo mea. Mu oo nakatzimodu mu numu-no nakasuipana oo nageka. Soo Te Pabe'e yise ka mu tunakatzimodu suu'mu watze tuukwe. ³³ "Jerusalem-wi te petugase, mu numu-kobenatu yadooadu numma tzakadukwu, yise umu wawa'a tibo-matoo e tzakakakwu, yise umu nuka batsa tuungukwu. ³⁴ Umu tibo'o yise e kobitoo toohena, e wupage-tana, yise e batsakwu. Pahe tabe mease nu yise saa'a tuusootabuedooa."

³⁵ Mu nawanga'a James-no John ka Te Pabe'e-baa petu, yise meeo oo netamma, "U haa'a sakwa

ne tummatzi?” ³⁶ Soo Te Pabe'e yise meeo mu tubenga, “Hownnnekoo sakwa nu mu tummatzi? Hemma mu soogwina?” ³⁷ Umu meeo oo nanekwegea, “U ka pudusoo numu-kobena katukwuse, how sakwa numme ka u-baa sapa aatana?” ³⁸ Soo Te Pabe'e meeo mu nanekwegea, “Nu nabatsase, namayodase yise saa'a ka numu-kobena katudooa. Mu haa'a punno'o oosoo?” ³⁹ Mu waha'yoo ka Te Pabe'e meeo netamma, “Numme sakwa punno'o oosoo mesoo mane.” Soo Te Pabe'e mu nanekwegea mee, “Aha. Mu punno'o nu-kwa'nekoosoo wumakwu nu-koobattoo nabatsase, saa'a namayodakwu. ⁴⁰ Gi nu ka mu numu-kobena mu aata tuungu-wa'ne'yoo. Mooasoo soo Te Naa oo nemamakwupuna mu oo sopedakwatoo.”

⁴¹ No'yoona mu oo nakatzimodu mu nakase, ka James noko John unu sutakute. ⁴²⁻⁴⁵ Soo Te Pabe'e yise meeo mu netamma, “Gi umu wawkawa'amu-kobena katudu-kwa'ne paba nasooyugwepana. Mu sakwa no'oko numu tummatzimo. Nu ooonne'yoo, ka yaa petuse, nu no'oko ka mu numu tummatza'e. Nu mu numu-koobattoo nabatsakwu, o'no saa'a mu numu gwet-zoidooa.”

⁴⁶ Soo Te Pabe'e ka pumme nakatzimodu-no ka Jericho mee naneadu-too meakwu. Ewa'yoo mu numu umu-no oo-toogoo me'a. Oosapa po kumabu katudu, soo nana gi tubootabuedu, Bartimaeus mee naneadu, nonotsu mu numu pu-moopaa meadu meeo netammakayakwe, “E tummatzi.” ⁴⁷ Yise oosoo ka Te Pabe'e kemmana nakase, meeo ka Te Pabe'e netamma, “U sakwa e sootuhi,” mee. ⁴⁸ Umu numu ewana oo nesag-

wikute, “Gi unnepana,” mee oo netamma. Oosoo ka Te Pabe'e pabasoo yadoo, “U sakwa e sootuhi.”
⁴⁹ Soo Te Pabe'e yise umu pumme nakatzimodu mee netamma, “Ka gi tubootabuedu, nu-baatoo bike.” Umu tunakatzimodu ka gi tubootabuedu nana mee netamma, “Besa nasooyugwese, yotse, soo Te Pabe'e yaa meno'o, u ba'e, mee.” ⁵⁰ Soo gi tubootabuedu nana yise tu naga'apu mawunise yotsehoo, yise ka Te Pabe'e-matoo takwue. ⁵¹ Soo Te Pabe'e yise meeo, “Hownnnekoo sakwa nu u tummatzi?” Soo gi tubootabuedu meeo, “Nu gi tubootabuena, enatu e poonnekwuna sookwa'e.” Soo Te Pabe'e yise mee oo netamma, ⁵² “Unudea, u ka e togesobedyase suu'mu, besa manekwu.” Oosoo gi tubootabuedu nana yise yaatu besa poonne manese, ka podo ka Te Pabe'e tuyohoka.

11

¹ Soo Te Pabe'e ka umu pumme nakatzimodu-no ka Jerusalem mee naneadu-kwitoo meana, ka Bethphage, noko Bethany mee nananeadu naamootoo mease, ka giba Olive mee naneadu tza'ge'e petuga. O'no soo Te Pabe'e waahoo umu pumme nakatzimodu-matu ² meeo netamma, “Ka Bethpage-witoo memeakwate. Onoko mu sumuoo tzagaze natzakunadu mayukwu, gisoo pukooba nakatudu. Oo tzadopase punowsoo saa'a oo wetzakake.” ³ Ka mu numu mumme tubenga, “How mu manakwe?” mee saa'a mu nekwegea, “Soo Te Pabe'e yabesoo a soog-wina saa'a yise punowsoo a makodyukudooa.”
⁴ Umu ka memease, ka tzagaze, ka nobe-kobena oo natzaku oo mayu petugase, oo tzadoopahoo.

⁵ Mu numu o konnodu mee mu tubenga, “How yise manena mu a tzadoopa?” ⁶ Umu ka Te Pabe'e unnena mu tuukwese, umu yise, “Muu-soo too'e,” mee mu netamma. ⁷ Mu waha'yoo naana yise ka tzagaze ka Te Pabe'e-baato tza-kakase, wega oo-kooba hanese, soo Te Pabe'e ka mu wega-kooba katuno'o. ⁸ Ewa'yoo numu tu wega ka po-kooba wupatzeta, susumudu numu punno'o sunngabe ma'na hanese, yise ka Te Pabe'e ooka podokute. ⁹ Ewa'yoo numu oo kumi meana ka Te Pabe'e nesootuhino'o, besa sok-wamana, papaba apegeana, “U yow, U Ne Tuhetse Pabe'e, no'oko numu magwetzoidu. ¹⁰ U numme-kooba katudu ka ne namooatupu David-wa'ne'yoo, numme besa sokwama soo Te Naa ka numme-matoo u tayase, soo Te Naa u tuhetse sootuhikwu. Soo Te Naa saa'a puusoo te magwetzoikwu.” ¹¹ Soo Te Pabe'e Jerusalem-wi petugase, ka nanesootuhi nobe-kwitoo meahoo, no'oko hemma oetu besa sootse'ma, pana ka mooasoo unu yongona oo mane-gapu umu tunakatzimodu-no Bethany-witoo mea'a.

¹²⁻¹³ Ka ookow mooo'a awamooa, soo Te Pabe'e ka umu tunakatzimodu-no Bethany-wi'yoona mea'a. Oosoo ka meana, ka sunngabe Fig mee naneadu poonnese, oo-matoo mea, ka tzuaya'ena. Ka tamano, ka sunngabe poee naa-kwi oo manepetuse, gisoo oo pooetoo'a oo mayu petu. Unu sunngabe naka-ga'yoo suu'mu. ¹⁴ Soo Te Pabe'e yise ka sunngabe meeo netamma, “Gi gea hannano'o u pooetooa-wa'ne'yoo.” Umu oo nakatzimodu oo naka.

¹⁵ Umu Te Pabe'e ka pumme nakatzimodu-no

ka Jerusalem-witoo mea'a, yise ka pabow nanane-sootuhi nobe tzage'e kodyu petuga. Mu weehooma tumudu poonne. Tu hemma tsanabedona, tu seepu-ma tumugonno tuwazoo. Soo Te Pabe'e yise ka hemma pukooba mu tuoonana manapow, oo kadunoo tuwazoo, yise oekoo mu numu matzayubow. ¹⁶ Soo Te Pabe'e meeo mu netamma, “Mu ka nobe'ana gi ma-toogoo meapana. Esoo pukwi'yoona tu nananesootuhina.” ¹⁷ Soo Te Pabe'e yise mee mu netamma, “O'nosoo soo Te Naa unnepu mee na'unakwe,

‘E nobe pukwi'yoona no'obatusoo numu nanesootuhina.’

Meno'o mu yise nanatuduha mi'yoona.” ¹⁸ Soo numu pabe'e, ka mu numu-koobattoo yadooadoonoo ka Te Pabe'e manena sopedakwatoose, oo-ma nakasua'e ka Te Pabe'e meeo unakwe, yise oo nebatasa, ka ewow numu ooka nakatoge'yookute. ¹⁹ Ka yongo-nakwa, soo Te Pabe'e umu pumme nakatzimodu-no punowsoo kodyuka, ka Bethany-wi tooibodona.

²⁰ Tu pudu taba tsebooegena, soo Te Pabe'e ka mu tunakatzimodu-no Jerusalem-witoo mea'a. Ka sunngabe mooasoo pasapu oo poonne. ²¹ Soo Peter ka Te Pabe'e unnena soomayuna mee oo netamma, “U ka etze'e ka sunngabe pasa tuungu, oosoo yise meno'o pasapu,” mee'e. ²²⁻²⁴ Soo Te Pabe'e yise meeo mu netamma, “Aha. Mu ekow sooma'yu. Mu sakwa ka Te Naa naka'oedyukuse nanesootuhi. U ka tunaka'oedyukuna, u ka giba ka banunadu-naamookwitoo nooyooa tuunguse, oosoo oo-toogoo manikwu. ²⁵⁻²⁶ Ka nanesootuhi manese, mu sakwa ka mumme suda

tumatugukudu soomu'wase. O'no Te Naa yise punno'o ka suda mu tumatuguna soomu'wakwu.”

²⁷ Ka Jerusalem-witoosoo kodyuse soo Te Pabe'e ka mu tunakatzimodu-no, ka nanesootuhi nobekobenakwi soo Te Pabe'e nanapedo meowbodote. Mu Jew numu tutunehanedu ka Te Pabe'e-baa petuse ²⁸ mee oo tubenga, “Haga pooha tunetamma-toohakwi u yoo manakwe?” ²⁹ Soo Te Pabe'e mu nanekwegea, “Nu ka John-witu mu mooe tuukwekwu. Mu ka kaaheno e nanekwegease o'no yise saa'a nu punno'o haga pooha-toohakwi 'yoo nu e manena mu tuukwekwu. ³⁰ Haga ka John meeo netammama oosoo numu baa-wi matzaka, soo Te Naa God, pute oosoo puusoo oo sukwe manakwe?” ³¹ Mu tutunehanedu yise puusoo nanano apegeagonnose, mee unakwe, “Tamme ka mee'e unnese soo Te Naa God ka John meeo netamma, soo Te Pabe'e meeo te tubengakwu, ‘How yise manena mu ka John gi nakabetsea?’ ³² Pana, ‘Soo John puusoo oo manakwe,’ mee te unnese mu numu punno'o te kusekakwu, soo John Te Naa nayadooawabe mee oo netammama, oo naka'oedyukuna.” ³³ Umu yise mee ka Te Pabe'e nanekwegea, “Numme gi oo sopedakwatoo.” Soo Te Pabe'e yise mee mu netamma, “Nu punno'o gi mu tuukwe-wa'ne'yoo ka haga pooha-toohakwi, e pooha ma'na'wena.”

12

¹ Soo Te Pabe'e ka mu numu-koobattoo yadooadu mee natugwenga, “Sumu'yoo nana puu tumasu'a. Soo nana tumasuase, oo na'oonnakwi koodua-doose, ka tu tumasuana

toogoo tuubane nobe-too. Ekow nobe-kwikoo hoobadookwuse. Oosoo tuwazoo tueya'e nobe-toose, ka tumasuape-matu mu numu tuukwena ka tubewabe mu mabetseakwu-kwitoo, yise kwinga'a mea. ² Ka tu nayasa-wi oo manepetuse, oosoo sumuoo numu ka tabewabe-witoo taya, pumme naamookwitoo oo tupooegea tuunguna. ³ Umu ka nana-ma tzakaduse oo mooedyakwehoo, yise oo taya, gi oo poee makana. ⁴ Soo tumasuadu yise punowsoo kumma'akoosoo pumme tummatzidu taya, umu numu yise suda manakwe, oo kwo-makoo oo wupageta gi hemma oo hanekute. ⁵ O'no yise soo tumasuadu ka kumma'akoosoo pumme tummatzidu taya tuwazoo. Umu yise oo patsow. Soo tumasuadu yise ewowsoo pumme tutummatzidu oetoo tayayakwe. Susumudu mu tutummatzidu oetoo natayadu nuupagetayakwe yise umu-matu punno'o nago'e. ⁶ Nakwitoo ka tu besaa tooa tu nabenina umu-matoo taya mee tusooyugwena, 'Umu ka e besaa tooa naka'oedyukuna gi how a yugwe-wa'ne'yoo.' ⁷ Pana mu numu meeo nananetamma, 'Esoo ka tumasuadu besaa tooa. Tamme ka a batsowse, ka oo teepu manikwu.' ⁸ Umu yise oo-ma tzakaduse oo batsase ka tumasuape-kwitoo oo wuwazuhoo." ⁹ Soo Te Pabe'e yise meeo mu netamma, "Mu oo sopedakwatoo, soo tumasuadu sutakwu ka kodyu petuse, ka umu pumme tutummatzidu nagoese. O'no yise oosoo ka tabewabe kumma'akoosoo numu hane tuungukwu." ¹⁰⁻¹¹ Soo Te Pabe'e yise mee mu netamma, "Mu sakwa oo sopedakwadoo, ka o'nosoo Te Naa yadooawabe mee nu-witu

botugu,

‘Mu tupe nobe-tootu tumoodyipu tupe tookwa besa'yoo tupe, ka penakwa mu nobe namadabue-kwi oosoo tupe unu nadatzenga petu. Soo Te Naa yoo tumadabue, tamme yise tubetse besa sokwama ma-koobattoo.’ ”

¹² Mu numu-koobattoo yadooadu ka Te Pabe'e too'e nekwutuma, ka pukwitu oo sopedakwa-toose, umu ka mu numu-ma su'ina, sukwe me'a.

¹³ Mu numu-koobattoo yadooadu-matu Pharisee, mu wakwawa'a numu pabe'e pupua'amu-no, ka Te Pabe'e-matoo nataya. Yow umuoo numu ka Te Pabe'e unu nesoonaahadyakwedu.

¹⁴ Umu ka Te Pabe'e meeo netamma, “U tubetse besa'yoonaa, ka umu numu Te Naa-witu besa tunedyoo'e. U gi numu tutzeadu; yise gi tuwazoo u numu nesootzemadu. How haa'a sakwa tamme, ka mu wakwawa'a numu pabe'e tumanagaku?”

¹⁵ Soo Jesus mu sopedakwatoo ka pumme mu nesoonaahadyakwe yise meeo mu netamma, “Gi sakwa mu e nesoonaahadyakwepana, ka mu tumanagapu-matu e tzapoonneku.”

¹⁶ Umu yise oo tzapoonnese soo Te Pabe'e yise meeo mu netamma, “Haga mama namanaka, yise haga naneana mama nabo'o?” mee. Umu mee oo netamma, “Soo mu wakwawa'a pabe'e mama.”

¹⁷ Soo Te Pabe'e yise meeo mu netamma, “Tamme sakwa mu wakwawa'a numu pabe'e gea, esoo umuoo nanumu tumadabuena. Tamme sakwa ka Te Naa tumadabuena, ka Te Naasoo gea.” Mu numu besa o sukwe poo'nepebu'ahoo.

¹⁸ Mu sumubaatu nanesootuhidu numu, Sadducee mee nananeadu, ka Te Pabe'e-baa petuga. Umu Sadducee meeo nananesootuhidu, soo numu ka ya'ese sumu tammesoo me'adu. ¹⁹ Umu meeo ka Te Pabe'e tuukwe, "O'nosoo ka Moses tunetammapu umu mayohodu, ka tu pabe'e gi dooamu-gakoo kadoo'oo oo manese, soo penakwatu oo wannga'a sakwa oo nodukwadoose, tu pabe'e dooamu-dooku. ²⁰ Natakwatsukwe'yoo (7) mu nanakwanga'amu. Oosoo mu tubetse pabe'e ka ekow mogo'ne mooe nodukwa-ga'yoo. Ka tu mooe kooma kadoo manese, gi oo-makoo dooamu-ga'yoo. ²¹ Ka oo pabe'e ya'ese, oo wannga'a koomadoo. Ooka tuwazoo ya'ese, gisoo tuwow oo-makoo dooamu-ga'yoo. ²² Umuoo natakwatsukwuoo (7) naana esoo mogo'ne nanasusu'mu mu koomadookese, gisoo umu-makoo dooamu-gana yise punno'o kadoo 'mane. ²³ Esoo mogo'ne yise ka saa'a namayodase haga kooma-gakwu? Mu no'yoona natakwatsukwu'yoo (7) nanakwannga'amu oo nodukwa-gakena," mee'e umu oo nesootzemana unakwe. ²⁴ Soo Te Pabe'e meeo mu Sadducee netamma, "Mu gi o nakasopedakwatoo ka Te Naa tubetse tunetammapu, tamme oo pooha netammapu. ²⁵ Mu sakwa yise ka saa'a namayodase mu toha kakasa-gakoo Te Naa tummatzidu-kwa'ne, mu gi mu nodukwa-gana soohanekwu. ²⁶ Mu ka oo naka'oedyukuna tooe mu tuisse sapa. Mu saa'a gi moobegwaga gwetzoimokwu ka Te Naa-baa petugase. Te Naa tamme tunetammakuna. Moses ka pooewunudu niwunu oo-kobena wunu, soo Te Naa yise ka

Moses meeo netamma, ‘Mu Abraham, mu Isaac, mu Jacob puu tooesoo nu-matoo nanesootuha’e. Nu yise mu Nanesootuhi Naa.’ ” ²⁷ Soo Te Pabe’e yise meeo mu netamma, “Te Naa gi mu tuipe Naa, mu togesoo modu suu’mu. Mu ka Te Naa nanetsagwayipana, mu tubetse gi oo naka’oedyukute.”

²⁸ Oosoo sumu’yoo nana mu tunedyooedumatu, oona oo nakakwunu. Ka Te Pabe’e no’osoo pumme mu numu tubenga, besa mu nanekwege’a mee oo nakasoobedya, soo nana ka Te Pabe’e yise meeo tubenga, “Hanotu umu-matu ka Te Naa unnepu oonnakwa besa’yoo umu te tumayohopedumatu?” ²⁹ Soo Te Pabe’e yise meeo oo netamma, “Waha-baatu esoo na’unnepu Te Naa tamme tuukwepu besa’yoo. Mooe’ugasoo,

‘Soo Te Naa Te Manumudoopu. ³⁰ Tamme sakwa tubetse besa oo soobedya.’

³¹ Soo penakwatu yise meeo.

‘Tamme sakwa mu numu besa soobedya tamme-soo nasooobedya-kwa’ne.’ ”

³² Soo nana meeo oo netamma, “Besa’yoo soo nayadooape. Oosoo sumu’yoosoo, Te Naa Te Manumudoopu. O oosoo Te Naa. ³³ Tamme punno’o sakwa ka Te Naa besa soobedya. Soo penakwatu yise, tamme sakwa tammesoo besa nanasoobedya, tuwazoo. Umu waha’yoo no’okosoo nanesootuhipu oonnakwa besa’yoo.”

³⁴ Soo Te Pabe’e yise mee oo netamma, “U unu soonammedu. U tookwa unu oo naka’oedyukukwu.” Umu numu yise naka nasookwise gi hemma ka Te Pabe’e tubenga mani.

³⁵ Soo Te Pabe'e yise ka pabow nanesootuhi nobe-kobena petu, umu ewa'yoo numu o manepunne. Soo Te Pabe'e yise meeo mu numu netamma, "Umu ka Te Pabe'e tuukwewabe David-matu mee oo netamma. ³⁶ Pana soo David ka Te Naa pooha-toohakwi Te Pabe'e mee oo natuba'nga. Ka David tubotugu-kwi meeo, 'Soo Te Naa ka Te Pabe'e mee netammapu, "U sakwa oosapa e tumadinakwu katu ka umu ume wohonedu e matzooekuno'otoo."

³⁷ How yise soo David Te Pabe'e mee oo natuba'nga ka punakwana oo nanekemma sapa?" mee'e soo Te Pabe'e mu tubenga.

³⁸ "Ka mu meeo tuukwedu gi naka'oedyukupana, umu tu nanesookwugina sukwe soogwidu. Umu numu tunedyooedu unu besow namasoo'a. ³⁹ Ka paba tu na'ewa tukano'o, umu besa-kwi tu katuna soogwa'e. Ka nanesootuhi nobe-kwi'yoona, tuwazoo unu besa-kwi tu katuna soogwa'e. ⁴⁰ Umu yise ka mu pepeawabe hemma tuduhana mu nanesootuhikute. Umu sugwe'apa wuna'me mu nanesootuhikute. Umu gi besa numu tunedyooedu. Umu unu suda manedu tumatuguna, umu-matoosoo kodyukwu."

⁴¹ Soo Te Pabe'e mu owenapa mu poonne katu, ka mu numu ewana ka tumasumudoope-kwi tu-tuonadyakwe. Susumudu mu naana ewow heega'yoo ewa oe tutuoo'na. ⁴² Sumu'yoo mogo'ne tu kooma kadoo'oo manekupu umu-tamme kemma. Gi hemma mapu'a, oosoo yise huutse oe tutu-uoo'na. ⁴³ Soo Te Pabe'e yise mee mu tunakatz-

imodu netamma, “Yaa esoo mogo'ne. Esoo tu penebetu oe tuoonahoo. ⁴⁴ Yise mu naana gi ewa oe tutuoo'na ka a namasumutoo-kwi, tooe ewa oo hee-gapana. Esoo mogo'ne tu penebetu oe tuoonahoo. Gi haa'nokoo oe tuoona, pana a besana puma mu gwetzoina mee nu.”

13

¹ Ka nanesootuhi nobe-kwi'yoona, sumu'yoo mu tunakatzimodu-matu ka Te Pabe'e meeo netamma, “Esoo nanesootuhi nobe tupe noko namadabuepu-ga'yoo. Mu yaatu tupe papaba'yoo. Esoo nanesootuhi nobe besa tabu'a.”

² Soo Te Pabe'e meeo oo netamma, “Esoo nobe besa'yoo pana te wokwohomu no'oko a wuyoomedakwunikwu.”

³ Umu yise ka tuutsekoo giba-ma, Olive mee naneadu-kwitoo mease o aata'a, ka nanesootuhi nobe poonne. Peter, James, John, Andrew yise mee oo watse tubenga. ⁴ “How sakwa tamme oo sopedakwato tabua, ka nobe nuudyoomedakwuna? Hee te tzapoonnekukwu hannano'o oo manikwuna?”

⁵⁻⁶ Soo Te Pabe'e meeo mu nanekwege'a, “Ewa'yoo numu meeo naneyugwedu, yow numme Te Pabe'e. Nu gi mu esayaedu-matu, meeo soo esayaedu mu tuukwekwu. Ewa'yoo mu numu nanemooagakwu. Gi mu naka'oedyukupana. ⁷ Tooe hanotu tooe mu numu mesoo nanago'e. Gi saa'a su'ipana. Gi soo te teepu suda mane-wa'ne'yoo, gi meeo hemma sooyugwepana.

⁸ Mu numu yise nanano ewa nanagoekwu. Tooe hanotu tooe saa'a, soo te teepu yutsungadoo. Mu

numu saa'a tseagoedooa. Gi besow saa'a hemma mu poonnedooa.”

⁹ Soo Te Pabe'e yise mee mu netamma, “Mu sakwa namasootzema. Mu sumuna nahemase, mu nanehanedooa. Mu saa'a nuupagetadooa. Mu gi e naka'oedyukudu saa'a gi mu petzabedooa. Mu yise nuga besa unnepu mu tuukwedooa.

¹⁰ No'obatusoo mu numu saa'a e unnepu nakadooa. ¹¹ Mu ka nakwutumase, gi suda oo soonekupana ka hayoo mu unnekwuna. Soo Te Naa Besa Pooha ooka mada'e. ¹²⁻¹³ Ewa'yoo mu numu gi e petzabedooa, mu nananumudooe suda mu matugudooa, yise mu goedooa saa'a. Ka umu gi e soo'oedyukudu, gi mumme numu petzabedu, gi e naka'oedyukudu, gi e ma'wukadu, nu magwetzoikwu.

¹⁴ Tooe hemma tooe suta'yoo* ka nanesootuhi nobe-kobena natzekwunukukwu. O'no sakwa mu ka oo poonnese, Judea-wi'yoona yabesoo mea'a.

¹⁵ Oosoo tu nobe-kobena wununnummedu sakwa gi tu nobe-kwitu hemma gwuupana, yabesoo meeow. ¹⁶ Soo tubewabe-kwitu hemma how yugwewunudu sakwa punno'o gi hemma gwuupana, gi tu nobe-kwitoo kodyupana, yabesoo meeow.

¹⁷ Ka yabesoo mea'akwuse, mu koheadu-kwi gi besa, ka mu sutuba mea'akwuse mu oonga'a petzekudu punno'o. ¹⁸ Umu sakwa nanesootuhi gi sakwa tommo hee oo suda manepana. ¹⁹ Esoo gi besa a namanekwuna tubetse unu suda, gi hannano'o namanedu ka teepu namadabuese.

²⁰ Te Naa yise ka umu tu tutzeanana sootuhikwu,

* ^{13:14} Tamme sakwa oo sopedakwatoo ka hemma sutahoo ka Te Pabe'e tuukwe-kwitu.

ka gi oo tzadyoo'ikuna gi haga namagwetzo'i-wa'ne'yoo.

²¹ Tooe haga tooe sumuna meeo mu tuukwekwu, 'Soo Te Pabe'e mooasoo kodyu petu.' Gi oo naka oedyukupana. ²² Ewa tuwazoo na'esagoekwu, 'Nu Yow Mu Pabe'e mee na'unnekwu.' Ewasoo mu numu moohedu numu nemooagayakwe. Nanasookwugi hemma mu tzapoonnekukwu, tooe hemma tooe pooha mahanekwu, ka umu e dooamu too'e nemooagana. ²³ Mooasoo nu mu tuukwepu. Ooonne'yoona sakwa mu namasootzemapunne.

²⁴ O'no ka gi hemma besa manekwuse, soo taba toganohookwu, soo muha punno'o. ²⁵ Mu paatoozooba punno'o sawedyikwu. ²⁶ No'yoona mu numu punno'o ka koomeba-nagakoo e pooha kodyu petukwuna poonnekwu. ²⁷ Umu toha kakasa-ga'yoo e tutummatzikwutu, tooe hanotu tooe ka yaa teepu-kooba'yoona, mu e nanumu nubaa hanepetukwu.

²⁸ Ka sunngabe pooedooase, mu meeo sokwamadooda, tamme tookwa tamatsebooe. ²⁹ Ka gi besa hemma manekese, mu yise oo sopedakwadookwu, nu tookwa pudusoo kodyu petukwu. ³⁰ Susumudu mu numu-matu ka hemma oo manedu poonnekwu gisoo ya'ena. ³¹ Nuga unnepu besa na'unnedu, gi atasoo naneyugwe-wa'ne'yoo.

³² Ka hannano'o oe e petuookwuna manepetuse, gi haga ka teepu-koobatu oo sopedakwato. Mu togoopatu Te Naa tutummatzidu puu gi, nu punno'o gi. Te Naa suu'mu oo sopedakwadoop-

unne ka hannano'o e petuookwuna. ³³ Mu sakwa ooosapa namasootzemapunne.

³⁴ Nu-kwa'nesoo, sumu'yoo numu puu ka meakwuse, ka hemma how pumme yugwekudu hemma nemanekuga. Ka tu'eyaedu meeo netamma, 'Gi u'wepana.' ³⁵⁻³⁷ Mu sakwa nonotsu tabeno nuummabetsabena. Tooe hannano'o tooe nu kemmowgena, yongona, togano, awamooasoo. Nu sumuna gi mu nuummabetsape mu mayu petukwu."

14

¹ Mooa yongona oetu, o'nosoo te manena te natzama'wukwuna soomayuna, yise ewa tukakwu, ka Gi Namayuadu Tukaba tukakwu. Soo Jew numu tutunehanedu ka Te Pabe'e watze nesootze'ma mee yise, "How sakwa tamme ka Jesus watze tzakadu tabuase, oo batsa? ² Tamme sakwa gi numu poonnena oo batsapana, mu numu tamme-no nagoedooa."

³ Soo Te Pabe'e ka Bethany-wi ka Simon Tookoo Pehe mee naneadu nobe-kwi. Mu tukawunu, sumu'yoo mogo'ne oe petuoo. Ka tupe osa-witu ka besa kwanadu nakwana'a gwuuna. Ka osa tsabadowse, ka Te Pabe'e kwo-kooba oo tuoonahoo. ⁴⁻⁵ Susumudu mu Te Pabe'e-batu ka mogo'ne manena nesootu'adya'e, "Oosoo sakwa gi oo nahadyagwepana ka besa kwanadu nakwana'a oosoo ewa nanenagadu. Oosoo sakwa oo-ma tumuse mu tutuha manedu namadea."

⁶ Soo Te Pabe'e yise meeo mu netamma, "A tsasoopeya. Gi a nesootu'adya'epana. Esoo mogo'ne besa manakwe. ⁷ Mu tutuha manedu tooe hannano'o pana ooosapa mu-no'yookwu,

pana nu gi ooosapa mu-no'yookwu. ⁸ Soo mogo'ne manena dea'a, e natugukwu-kwitoo a natumay-ohona. ⁹ Tooe hano tooe ka teepu kaa'no, ka besa nayadooadu-kwi esoo mogo'ne manepu saa'a nanatugwengadooa. Oo-makoo tamme nana-soomayudooa.”

¹⁰ Sumu'yoo mu Te Pabe'e nakatzimodu-matu Judas Iscariot mee naneadu ka mu Jew numu tutunehanedu-baa petuse mee mu netamma, “Nu oo sopedakwatoo ka Ne Pabe'e pukwi'yoona nu sumuna mu tuukwekwu.” ¹¹ Mu tutunehanedu besa sokwama ka oo nakase umu yise ka Judas tumasumudooku. Soo Judas yise meeoo soonamme, “Hownnnekoo sakwa nu ka Te Pabe'e-matoo mu bika?”

¹² Yaa tabeno numme ka seepu tooa'a batsakwu, ka gi namayuadu tukaba noko oo ewa tukakwuse mu oo nakatzimodu yise ka Te Pabe'e tubenga, “Hano'yoona sakwa tamme ewa tuka?” ¹³ Soo Te Pabe'e yise waahoo mu tunakatzimodu-matu tayase. Mee mu netamma, “Ka nana baa tzan-odu mu saa'a wegeadooa. ¹⁴ Mu saa'a ookow nageakadooa. Ka nobe-kwi oo egeakase oonosoosaa'a tzoonoahookwatese ka nana nobegakoo mee netamma, ‘Soo Te Pabe'e umu pumme nakatzimodu-no yaa u-baa'yoona nanesootuhi yongo tukakwu.’ ¹⁵ Esoo nana nobe-ga'yoo yise mu tzapoonnekukwu, ka pa'atu nobe-kwi'yoona ka tukapu mu yonga tukakwuna mu saadooa.” ¹⁶ Mu waha'yoo yise memea, ka Te Pabe'e unne-toosoo manekwuse.

¹⁷ Ka tu yongose Te Pabe'e umu tunakatzimodu-no ka nobe-kwi petuga. ¹⁸ Umu-no tukanasoo, Te

Pabe'e mee unakwe, “Sumu'yoo mu-matu nu-no tukadu ka mu tukwutumadu nu-matoo bikekwu, umu yise e batsakwu.”

¹⁹ Mu Te Pabe'e nakatzimodu oo nakase, suda nuummana, umu nanasusu'mu'yoona mee unakwe, “Nu haa'a?” ²⁰ Soo Te Pabe'e mu nekkegea, “Sumu'yoo mu-nagatu nu-no tukadu. ²¹ Too'e soo Te Naa mooasoo, 'U nabatsakwu,' mee tunetammapana, saa'a oosoo umu e wohomu nu-matoo bikepu tuma'emukwana oo-matoosoo kodyukwu.”

²² Mu tuka, soo Te Pabe'e tukaba gwuuhoose, oo-koobattoo nanesootuhise oo tzaboka. Yise umu tunakatzimodu hemese ooka mu tuka tuungu, mee unnena, “Esoo puu nuga tookoo-wa'ne'yoosoo.” ²³ Yise ka besow atsa baa yoongase oo-koobattoo nanesootuhise, ooka mu hebe tuungu. ²⁴ Soo Te Pabe'e mee'e unnena, “Esoo puu nuga puupe-wa'ne'yoosoo. Te Naa Toogoopatu besa unnena tunetamma, suda mu manepu-koobattoo e nabatsakwuse. ²⁵ Nu mu tuukwe'e nu ekow atsa baa ka yaa teepu-koobatu tubetse gi hebekwusoo, saa'a ka Te Naa ka te teepu mapudutupudoose, o'no yise nu tubetse pudutupusoo hebekwu.”

²⁶ Umu yise nanesootuhi hoobea nekwuna ka Olive mee naneadu tuutsekoo giba-matoo mea'a. ²⁷ Soo Te Pabe'e yise mee ne netamma, “Ka yaa togano suda tu namanikwuse mu e ma'wuookakwu. O'nosoo soo Te Naa yadooawabe mee'e tubotugupu, mee'e na'unakwe ka meno'o Te Pabe'e manekwuna.

'Soo seepu takonedu nabatsahookwu, mu seepu yise nana'emota petugwahookwu.'

²⁸ Nu saa'a e ya'ekwukoo namayodase, Galilee-witoo mu-kobenasoo meadooda. Mu saa'a, o nu-baa petugadooda.”

²⁹ Soo Peter meeo ka Te Pabe'e netamma, “Mu u nakatzimodu sumuna u-kooba'yoona mea'akwu, nu gi umu-no meakwu.”

³⁰ Soo Te Pabe'e meeo ka Peter netamma, “To-gesoo tu toganopunne, ka tsekana kwu'a gisoo wahadoodo oo yaka, u pahedoodo oona numu tuuk-wekwu u gi e sopedakwatoo mee.”

³¹ Soo Peter yise meeo Te Pabe'e netamma, “Tooe umu e batsakwu mee unnepana nu gi meeo unne-wa'ne'yoo, ka gi u-ma nasookwina.” Mu Te Pabe'e nakatzimodu no'yoona oo-wa'nesoo unakwe.

³² Ka Olive namasu'a-wi petuse, Gethsemane mee naneadu, soo Te Pabe'e mu tunakatzimodu mee netamma, “Yowsoo aatapunne. Nu nanesootuhigakwu.”

³³ Mu Peter, James, John oo-no mea'a. ³⁴ Soo Te Pabe'e mee mu netamma, “E pewu-kwitu tubetse suda nuumma. Mu sakwa yaahoosoo aatapunne.”

³⁵ Soo Te Pabe'e sagwane umu kwinga'atoosoo meahoose, o ka teepu-kooba meatzedose, yise nanesootuhikooa. ³⁶ “E Naa Toogoopatu. Nuga Naa Toogoopatu. Nuka u tunetammakuse nu oo-toogoo meakwu. Ekow e pewu-kwitu suda nu-ummana, kadoo'oo mayugwe.” Soo Te Pabe'e ka nanesootuhimakwuse ³⁷ tu pupua'amu utua'e mu mayu petuga. Soo Te Pabe'e mee mu netamma, “How mu tubetse unu utuigapu-ga'yoo?” Soo Te Pabe'e ka Peter meeo netamma, “U sakwa gi uwepana.” ³⁸ No'oko yise meeo netamma, “Mu

sakwa nanesootuhi aata o'no soo suta'yoo gi mu matzama. Mu gi oo mapu'a ka gi manese mee'e nu.”

³⁹ Soo Te Pabe'e yise penakwa nanesootuhigase ka mooe'ugasoo tu nanesootuhi-kwa'nekoosoo nanesootuhi. ⁴⁰ Yise tu pupua'amu-baa kodyu petuse, mu utua'e mu mayu petusoo. ⁴¹⁻⁴² Yise nanesootuhigasoo tuwazoo saa'a umu-baasoo kodyu petu, tooesoo mu utua'e. Soo Te Pabe'e yise meeo mu netamma, “Yow haa'a mu togesoo utua'e? Yosuhoo, tamme mea'akwu, meno'o oe mani petu, nu natzakwenekwu. Yaa soo suta'yoo nana kemma.”

⁴³⁻⁴⁵ Ka Te Pabe'e togesoo yadoo'a, Judas petuoo, mu Jew numu tutunehanedu mu tukwutumadu taya ka Judas noko. Pabatze'ekoo koodoo'oo noko tsegesa hemana. Soo Judas, ka Te Pabe'e-matoo tooe. Soo Judas yise oo-no namitzadya'me o'no umu oo sopedakwatoo. ⁴⁶ Umu yise ka Te Pabe'e-ma tsakatu.

⁴⁷ Sumu'yoo umu Te Pabe'e nakatzimodu-matu yise tsegesa-ma ka mu Jew numu tunehanedu pabe'e tummatzidu naka wuga'akwunihoo. ⁴⁸ Soo Te Pabe'e yise ka mu tukwutumadu meeo netamma, “Nu gi suda tumatugudu, gi nu naduyadu, gi tuduhadu tuwazoo. Gi sakwa mu koodoo'ooma e tumahepana, tsegesa-ma tuwazoo. ⁴⁹ Tooe ka e nanesootuhi nobe-kwikoo sapa, mu gi nu-ma tzakadupu-ga'yoo. Muusoo too'e. Mooasoo soo tubope ebeoo nabotuku, o'nosoo Te Naa tamme tuukwe-kwa'nesoo.” ⁵⁰ Mu Te Pabe'e nakatzimodu oo-ma su'ise, ka Te Pabe'e-baa'yoonamabetugwahoo. ⁵¹ Nu ka tooebetsena, ka Te Pabe'e

nagwuuhoose, naga'apu-wi wunaga'a yaahoose ka Te Pabe'e-nakwi meano'o. ⁵² Umu tukwutumu e naga'apu-ma tsakatu, nu yise e naga'apu makwumahoose namameow.

⁵³ Umu yise ka Te Pabe'e na'enakwakoo oo puta-ma tzakaduse, ka Jew numu pabe'e-matu oo tsakaka. Umu tutunehanedu oo nehanekwu.

⁵⁴ Soo Peter kwinga'a mu nakwi me'a, ka Jew numu pabe'e nobe-kobena petugase, o yooekatu.

⁵⁵ Soo Jew numu pabe'e ka mu tutunehanedu-no ka Te Pabe'e too'e batsakwuse, gi toge oo manena too'e nemayupana gi hemma nemama'yu.

⁵⁶⁻⁵⁷ Susumudu nanana oo manena too'e wahana sukwe esago'e. Umu too'e tuukwepana kadoo'oo hee, tubetse gi hemma nemama'yu. ⁵⁸ “Numme meeo oo unakwe oo naka, ‘Nu ka nobe, ka

Te Naa-matoo pukwi'yoona te nanesootuhina kadoo'oo mesoo mayugwe, yise pahe tabeba-wi oo mesoo mayota.’ ” ⁵⁹ Mu naana gi nanakwa'nesoo unakwe.

⁶⁰ Soo Jew numu pabe'e umu-kobena'yoona ka Te Pabe'e tubenga, “Togesapa haa'a umu nanana meeo u netamma?” ⁶¹ Soo Te Pabe'e tubetse gi hiyoo unakwe. Soo Jew numu pabe'e yise mee oo

tubenga, “U haa'a Te Pabe'e? U haa'a toogoopatu Te Naa Tooa?” ⁶² Soo Te Pabe'e mee oo nanekwegea, “Aha, mu oe'yoopana e poonnekwu, nu

Te Naa Toogoopatu-kumaba katukwu. Saa'a nu koomeba-naga petuookwu, o'no yise mu e pooha poonnekwu.” ⁶³ Soo Jew numu pabe'e yise tubetse unu sutahoose tu kwasu tsakebu'ehoo, mee

mu netamma, “Oosoo suda unakwe ka Te Nawa'ne'yoo mee naneyugwena. Gi tamme manatusoo oetusoo wahakwutu sookwa'e. ⁶⁴ Mu oo

naka ka suda oo unakwe mu sakwa hayoo oetu netamma. Ha'yoo mu sokwama?" Mu numu tutunehanedu mee oo netamma, "Tamme sakwa oo batsa."

⁶⁵ Yise o kobitoo toohegonno, o pooe kwudumowse, oo wupageta, mee yise oo netamma, "Ne tuukwe ka pooha-gana, haga u wupageta?" Mu tutukwutumadu oo-ma tzakaduse, yise oo koba mabatseoo.

⁶⁶⁻⁶⁷ Soo Peter yise ka Jew numu tunehanedu naa nobe-kobena pedana oe yooekatu. Sumu'yoo tsuadumu ka Jew numu tunehanedu naa hemma how yugwegudu, ka Peter meeo netamma, "U haa'a yise ka Jesus nakatzimodu-matu?" mee.

⁶⁸ Soo Peter mee oo nanekwegea, "Nu gi oo sope-dakwato." Soo Peter meeowse ka natzakwona'a kumabu wunu.

⁶⁹ Soo tsuadumu ka mu numu o konnodu meeo netamma, "Esoo nana ka Jesus nakatzimodu-matu."

⁷⁰ Soo Peter ka mu numu-ma unu su'ina punno'o mee oo netamma, "Gi nu." Pudusoo mu numu o toonoobatu meeo oo netamma, "U tookwa togesapa yow ka Jesus nakatzimodu-matu. U ka Galilee-witu."

⁷¹ Soo Peter meeo mu netamma, "Gi nu mu numu nemooagadu, nu gi umu-matu."

⁷² Yise tsekana kwu'a waha yaga. Soo Peter ka Te Pabe'e pumme netammama soomayuse, suda soonammena, yagakooa.

15

¹ Awamooasoo soo mu Jew numu tutunehanedu ka Te Pabe'e batsakwu mee tunehane. Yise ka Te Pabe'e mi tzakunase, ka teepu-kooba katudu naa, Pilate mee naneadu-kobena oo tzaka petuga.

² Soo Pilate mee ka Te Pabe'e tubenga, “U haa'a ka mu Jew numu-kooba katukwudu?” Soo Te Pabe'e oo nekwege'a, “Aha, nu yow oosoo.” ³ Mu Jew numu tutunehanedu mee ka Te Pabe'e netamma, “Ewa u suda manakwe.” ⁴ Soo Pilate yise mee ka Te Pabe'e netamma, “Umu tooe hayoo tooe u netamma. U haa'a gi oo naka, o'no u gi hayoo unakwe?” ⁵ Pana soo Te Pabe'e gisoo tuwazoo hayoo sukwe unakwe. Soo Pilate meeo soonamme, “Nu gi o nakasopedakwato ha'oo mane-naga masoo gi mu nanekwege'a.”

⁶ Nonotsa sumu tomoyina tu na'ewa tukano'o soo numu-kooba katudu sumuoo mu nakwutumadu-matu tzama'wuyakwe, ka mu numu unne-makoosoo. ⁷⁻¹¹ Ewa'yoo mu numu ka Pilate-baa petuse, yise meeo oo netamma, “U sakwa sumuoo mu nakwutumadu-matu tzatsebooe.” Soo Pilate oo nesopedakwato ka Jew tutunehanedu gi Te Pabe'e soobetzabena, ooonne'yoona yise mu numu tutunehanedu ka Te Pabe'e wutuma. Soo Pilate meeo mu tubenga, “Mu haa'a ka Mu Pabe'e Jesus tzama'wukwu?” Mu Jew numu tutunehanedu meeo mu numu netamma, “Mu sakwa ka Pilate ka Barabbas tzatsebooe tuungu.” Oosoo nana, Barabbas mee naneadu, tu pupuamu-no nakwutumadu. Umu ka mu Roman numu-no nanagoena, susumudu mu numu-matu nagoehoo.

¹² Soo Pilate mu numu mee netamma, “Esoo nana nu-baa petu, mu Jew Numu-kooba Katudu mee naneadu. How yise nu oo yugwekwu?” ¹³ Mu numu wa'agemo'o, “Oo tzakwenne. Oo batsa.” ¹⁴ Soo Pilate mee mu netamma, “How tu-

betse suda oosoo manakwe?” Mu numu pabasoo wa'agemo'o, “Oo batsa.” ¹⁵ Soo Pilate gi oo nebat-sapana, yise mu numu puusoo oo nebatsana. Soo Pilate yise ka Barabbas, ka mu tukwutumadu tzama'wu tuunguse, ka Te Pabe'e wupagetase oo batsa, pa'a oo taposa mee tunetamma.

¹⁶ Mu tukwutumadu ka Te Pabe'e, ka Pilate nobe-kwitoo tzakaka. No'yoona mu tukwutumadu oe sumuhoobetu. ¹⁷ Umu numu-kobena'yoona o wunaga'ayaakuhoo, mono-ga-kwi oo tzowupagaku. ¹⁸ Umu oo-ma'yoona naneko'ena, oo nematzamana, mee oo netamma, “U tookwa yow Jew Numu-kooba Katudu.” ¹⁹ Umu hoope-ma oo kwo-makoo oo wupagetana, oo kobitoo toohena, o-kobena meatzedona oo nasootzamekuna, oo-ma'yoona nanekoena. ²⁰ Umu Te Pabe'e nanetza'mekumakwuse, oo namasooapu-wisoo oo matabue. Umu yise ka Te Pabe'e tsakakase, oo batsakwu. ²¹ Umu tukwutumadu ka meadabena, Simon* mee naneadu wegeahoo. Mu tukwutumadu ka Simon nenoyukwe ka Te Pabe'e puma nataposakwuna oo tzano tuunguna.

²² Ka Te Pabe'e Numu Tzonoho mee naneadu-kwi o bi petuga. ²³ Yise umu atsa tutza'emukwa baa, noko natusooabe mayuana oo tooe hebe tuungu, soo Te Pabe'e yise gi oo hepe. ²⁴⁻²⁵ Yise awamooa umu oo mi-makoo pa'a oo taposa. Mu tukwutumadu yise oo kwasu nanatotsakwate. ²⁶ Ka sunngabe namadabue-ma puma oo nata-

* **15:21** Esoo nana oo natzano tuungudu, Simon mee naneadu. Oo doodooamu Alexander noko Rufus mee nananeadu. Cyrene mee naneadu-kwi tubewa-ga'yoo.

posana meeo natubo'o, "Yow esoo Jew Numu-kooba Katudu." ²⁷⁻²⁸ Waha'yoo tutuduhadu punno'o ka Te Pabe'e na'enakwana nataposa.

²⁹ Mu numu oo-moopa meagonnona, oo-ma'yoo naneko'e mee unnena, "U meeo unnepu, u Te Naa nobe wudyoomase, pahe tabewa-wi besa oo matabuekwusoo. ³⁰ U sakwa ka unu tumadina mama'yoo wuekese, uusoo namagwetzo." ³¹ Umu numu tutunehanedu oo-ma'yoo naneko'e mee unnena, "U mu numu magwetzoise,

pana yise gi hownnnekoo uusoo namagwetzo-wa'ne'yoo. ³² Hownne'yoo Ne Pabe'e U? Gi hownnnekoo uusoo namagwetzo-wa'ne'yoo, ka naduyana mee unnepana. Uusoo yaa teepu-matoo wuese, numme u naka'oedyukukwu." Umu punno'o oo na'enakwa nataposadu oo-ma'yoo naneko'e.

³³ Tabeno manakwana oona ka taba pahe-kwikoo tooe, ka teepu-koobakwitu toganopunne.

³⁴ Pahe-kwikoo tapuakese soo Te Pabe'e paba wa'age yadoo, "Eloi, Eloi, lama sabachthani," mee na'unnedu, "Nuga Naa, Nuga Naa, How manena u e matusookwuna'e?" ³⁵ Umu susumudu o konnopunnedu-nagatu mee unne, "Masoo tookwa ka Elijah, o'nosoo Te Naa yadooawabe mee naneadu bidyakwe."

³⁶ Sumu'yoo umu-nagatu yabesoo tanomanegase, yise yotsogadu wanapu, suda kammadu baa oodutsekoo hoope-ma oo tzetabekuse, ka Te Pabe'e tzatumakute. Pana mu susumudu meeo, "Oo tsasopedya. Sumuna soo Elijah tamme-baa tabua petuse oo magwetzoikwu." ³⁷ O'no soo Te Pabe'e paba wa'age, ya'eoo.

38-39 Soo tukwutumadu ka Te Pabe'e poonne ka oo ya'ehoose, mee yise unne, "Masoo tookwa too'e togesapa ka Te Naa Tooa'a." Soo wunapu ka Te Naa pooha pukwi'yoona numu nanesootuhidumakoo naamootoo natzakwenedu, ka Te Pabe'e ya'ehoose, soo wunapu pa'anakwana tubongo oo naamootoo natzagebu'ehoo. Soo teepu yutsungakoochase, mu tupe payooagonnona sawekoocha.

40-41 Ewa'yoo momoko'ne punno'o onow kwina'a konnopunnena oo poonnepunne, umuoo ka Galilee-wi'yoona ka Te Pabe'e-no kemmapu oo tummatzina. Umuoo momoko'ne-nagatu pahe'yoo, Mary Magdalene, yise Mary mu James noko Joseph pea, yise tuwazoo Zebedee nodukwa.

42-43 Soo nana, Joseph mee naneadu, Arimathea-wikoo nobe-ga'yoo, ka numu tutunehanedu-matu, unu napetzabedu. Toogoopatu Te Naa ka teepu besa oo yugwekwunu wutooedu. Ka tu pudu yongoga'a soo Joseph ka Pilate nobekwi petuga yise oo tubenga, "How sakwa u ka Te Pabe'e tookoo e tzagea?" 44 Soo Pilate mee unakwe, "Soo Jesus haa'a tubetse ya'epu?" Soo tukwutumadu nabise, yise natubenga, "Soo Jesus tubetse ya'epu haa'a?" Soo tukwutumadu, "Aha," mee unakwe. 45 Yise ka tukwutumadu nakase, soo Pilate ka Joseph mee oo netamma, "Yise a haneka." 46 Soo Joseph yise ka Te Pabe'e tookoo tzakwekuse toha wunapu hane petuse, oe oo manobea. Tupe tuwaga-kwi oo tugu. Pabow tupe o-kobenatoo tonanooehoo. 47 Umu Mary Magdalene-no, Joseph pea Mary mee naneadu, ka Te Pabe'e natugu-kwitu poonnepunne.

16

¹⁻² Sumu tabe mease, oogow mooa awamooa-soo taba pudu tseboogena, pahe'yoo momoko'ne ka Te Pabe'e natugu-kwitoo mea'a. Mary Magdalene, James pea, yise Salome-no. ³ Yise ka o meadabena meeo unnemena, “Haga yise ka pabow tupe o-kobenatu tonanooekwunikwu?”

⁴ Yise toogoonakwatu poohwise, soo paba'yoo tupe mooasoo natonanooekwunipu. ⁵ Oe mu tzoonooase sumu'yoo tooebetse toha kasa-ga'yoo Te Naa tutummatzi-matu, toha namasooana o katu. Mu momoko'ne oo-ma suiho. ⁶ Soo tooebetse mee mu netamma, “Mu sakwa gi suipana. Mu ka Te Pabe'e Nazareth-witu wate; oosoo nabat-sapu, oosoo kadoo'oo yaatu; mooasoo namayodapu. Poonne yaa oo habepu-witu kadoo'oo. ⁷ Mu sakwa mease, Te Pabe'e nakatzimodu tuukwe, Peter tuwazoo. Mooasoo soo Te Pabe'e mu mooenakwasoo Galilee-witoo meapu. Onoko yise mu oo poonnekwu, mooasoo mu natuukwepu.”

⁸ Umu momoko'ne yise o'no tatanomanega. Gi haga umu-matu sukwe yadoo'a, umu ka suihoose.

⁹ Soo Te Pabe'e tu ya'e-kwi'yoona namayodase, unu awamooasoo ka Mary Magdalene natzagoonneku petu, ka Mary Magdalene-nagakoo natakwatsukwuoo (7) tsoapa ta'yakwunipu-ga'yoo ka o'nosoo. ¹⁰ Mary saa'a ka umu Te Pabe'e nakatzimodu-matoo meahoose yise mu tuukwe petuga, umu yise oe'yoopana sagwa'e. ¹¹ “Te Pabe'e pudu namayoda. Nu o poonne,” mee mu netamma. Umu Te Pabe'e nakatzimodu gi oo naka'oedyukute.

¹² Soo Te Pabe'e atasoo tabuana, waahoo

nanana nobe-kwitoo mea'a. Yise umu-no manega. ¹³ Umu ka Te Pabe'e sopedakwatoohoose punowsoo memeahoo mu tunakatzimodu tuukwe petuga. Pana umu tunakatzimodu gi mu naka'oedyukute.

¹⁴ Penakwa mu Te Pabe'e nakatzimodu tuka, soo Te Pabe'e mu natzapoonneku, mee yise mu netamma, "How manena mu gi oo naka'oedyukute, tooe ka umu numu mumme tuukwe'e sapa?" ¹⁵ Ka tooe hano tooe yaa teepu-kooba momona, mu sakwa ka Te Naa besa yadooapu wahamo, no'obatusoo numu tuukwe. ¹⁶ Mu gi tunaka'oedyukudu, ka gi tookedu gosowitoo meakwu. Umu oe tunaka'oedyukudu yise baa-wi namatzakana namagwetzoikwu. ¹⁷ Umu oe unu tunaka'oedyukudu toogoopatu yadooamasoo yadooakoohakwu. ¹⁸ Tooe togogwa tuwazoo mu tokuese, tooetoo mu sutakoo hebehoose sapa, mu gi nuummaba wuma-wa'ne'yoo. Yise mu umu-kooba matuguna, mu nanesootuhikuna, mu tuoegoedu besa manekwu."

¹⁹ Soo Te Pabe'e umu-no yadooamakwuse, yise toogoopatoo tseboogase, ka Te Naa tumadinakwa katu petuga. ²⁰ Umu Te Pabe'e nakatzimodu tooe hano tooe numu besa o unnena tuukwemo'o, nanabesa tu tumadina pumme tu sootuhipu mu tzapoonekute. Esoo toge sapa. Maa'no sapa.

Te Naa Besa Unnepu
New Testament in Paiute, Northern (US:pao:Paiute,
Northern)

copyright © 2012 Wycliffe Bible Translators, Inc.

Language: Paiute, Northern

Translation by: Wycliffe Bible Translators, Inc.

Paiute, Northern [pao], USA

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Paiute, Northern

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

74e6207a-2a9c-5dcd-bc2c-f05c6aafd4f4